

唐詩品彙

卷之二十八
至三十二

七言古詩

四之八


5
20
11

| | |
|-------|-----|
| 內閣文庫 | 漢書類 |
| 六〇八六號 | 類 |
| 二〇八冊 | 冊 |
| 二架 | 架 |

八

| | |
|-----|------|
| 漢書門 | 六〇八六 |
| 類 | 號 |
| 函 | 架 |
| 冊 | 二〇 |

| | | | |
|------|-----|---|------|
| 內閣文庫 | 番號 | 漢 | 6086 |
| 冊數 | 20 | (| 8) |
| 函號 | 319 | | 139 |



唐詩品彙

七言古詩四之八

| | | | |
|-----------|----|---|-----|
| 東 京 圖 書 館 | | | |
| 二〇 | 三七 | 二 | 初 |
| 冊 | 號 | 架 | 函 |
| | | | 漢書門 |
| | | | 賦類 |

28
11
5

漢書門
賦類


不許帶出

七言古詩卷之四


唐詩品彙二十八

新寧高棟編輯

關中張恂重訂



淺草文庫



大家

杜甫

貧交行

翻手作雲覆手雨紛紛輕薄何須數君不見管鮑貧時交此道今人棄如土

劉須溪云口以從俗諺畧證古意

折檻行

嗚呼房魏不復見秦王學士時難羨青衿甯子困泥

塗白馬將軍若雷電千載少似朱雲人至今折檻空
嶙峋婁公不語宋公語尚憶先皇容直臣

大麥行

大麥乾枯小麥黃婦女行泣夫走藏東至集壁西梁
洋問誰腰鎌胡與羌豈無蜀兵三千人部領辛苦江
山長安得如鳥有羽翅託身白雲還故鄉

苦戰行

苦戰身死馬將軍自云伏波之子孫干戈未定失壯
士使我歎恨傷精魂去年江南討狂賊臨江把臂難
再得別時孤雲今不飛時獨看雲淚橫臆

悲陳濤

此詩爲房瑄而作也瑄與
祿山戰于陳濤斜敗績

孟冬十郡良家子血作陳濤澤中水野曠天清無戰
聲四萬義軍同日死羣胡歸來血洗箭仍唱胡歌飲
都市都人回首向北啼日夜更望官軍至

朱鳳行

此詩爲衡州刺史楊濟作也時
濟稱迎帥之職以討臧玠之亂

君不見瀟湘之山衡山高山巔朱鳳聲嗷嗷側身長
顧求其曹翅垂口噤心甚勞下愍白鳥在羅網黃雀
最少雛難逃願分竹實及螻蟻盡使鳴梟相怒號

越王樓歌

綿州州府何磊落顯慶年中越王作孤城西北起高

樓碧瓦朱甍照城郭樓下長江百丈清山頭落日半
輪明君王舊跡今人賞轉見千秋萬古情劉云不
深不淺

大覺高僧蘭若

巫山不見廬山遠松林蘭若秋風晚一老猶鳴日暮
鐘諸僧尚乞齋時飯香爐峰色隱晴湖種杏仙家近
白榆飛錫去年啼邑子獻花何日許門徒

秋風

秋風淅淅吹我衣東流之外西日微天晴小城擣練
急石古細路行人稀不知明月為誰好早晚孤帆他
夜歸會將白髮倚庭樹故園池臺今是非趙次公曰
此寫眼前

之景宛轉含蓄蓄道不盡淒感之意 劉云
如竹枝樂府矯矯長句不必親切為已

夜聞簫篋

夜聞簫篋滄江上衰年側耳情所嚮鄰舟一聽多感
傷塞曲三更歛悲壯積雪飛霜此夜寒孤燈急管復
風湍君知天地干戈滿不見江湖行路難劉云若知
干戈如此

別不復恨行路
矣 實歷喟然

乾元中寓居同谷縣作歌七首李薦師友
記聞太白

遠別離蜀道難與子美寓居同谷七
歌風騷之極致不在屈原之下也

有客有客字子美白頭亂髮垂過耳歲拾橡栗隨狙
公天寒日暮山谷裏中原無書歸不得手足凍皴皮

肉死嗚呼一歌兮歌已哀悲風爲我從天來

其二

長鑱長鑱白木柄劉云一歌喚子美二我生托子以

爲命黃精無苗山雪盛短衣數挽不掩脛此時與子

空歸來男呻女吟四壁靜嗚呼二歌兮歌始放閭里

爲我色惆悵劉云非必人人爲我惆悵而有其色

其三

有弟有弟在遠方三人各瘦何人強生別展轉不相

見胡塵暗天道路長東飛鴛鴦後鵝鶻安得送我至

汝傷嗚呼三歌兮歌三發汝歸何處收兄骨

其四

有妹有妹在鐘離良人早沒諸孤癡長淮浪高蛟龍

怒十年不見來何時扁舟欲往箭滿眼杳杳南國多

旌旗嗚呼四歌兮歌四奏林猿爲我啼清晝

其五

四山多風谿水急寒雨颯颯枯樹濕劉云是景黃蒿古

城雲不開白狐跳梁黃狐立我生胡爲在窮谷中夜

起坐萬感集嗚呼五歌兮歌正長魂招不來歸故鄉

劉云何其魂招不來耶歸故鄉也

其六

南有龍兮在山湫古木龍從枝相樛木葉黃落龍正
蟄蝮蛇東來水上遊我行怪此安敢出拔劍欲斬且
復休嗚呼六歌兮歌思遲谿壑爲我迴春姿

劉云獨此歌迴

春姿者愿車駕反正之辭也心所同然于載如對

其七

男兒生不成名身已老三年饑走荒山道長安卿相
多少年富貴應須致身早山中儒生舊相識但話宿
昔傷懷抱嗚呼七歌兮俏終曲仰視皇天白日速

劉云

聲氣俱盡孫季昭示兒編云歐陽公傷五季之亂作五代史序論故盡以嗚呼冠其首杜于美傷唐室之亂作詩史於歌行間以嗚呼結其末同谷歌冬狩行折檻行白馬詩等篇是也前

此詩人所稀有者公獨用之其傷今思古之意歟

短歌行贈王郎司直

王郎酒酣拔劍砍地歌莫哀我能拔爾抑塞磊落之
奇才豫樟翻風白日動鯨魚跋浪滄溟開且脫劍佩
休徘徊西得諸侯棹錦水

劉云西得諸侯以下謂王司直知我我復捨此何向

欲向何門跋珠履仲宣樓頭春色深青眼高歌望吾

子眼中之人吾老矣

劉云豪氣激人堂堂復堂堂

玄都壇寄元逸人

故人昔隱東蒙峰已佩含景蒼精龍故人今居子午
谷獨在陰崖結茆屋屋前太古玄都壇青石漠漠常

風寒子規夜啼山竹裂王母晝下雲旗翻知君此計
成長往芝草琅玕日應長鐵鑊高垂不可攀致身福
地何蕭爽

莫相疑行

男兒生無所成頭皓白牙齒欲落真可惜憶獻三賦
蓬萊宮自怪一日聲輝赫集賢學士如堵墻觀我落
筆中書堂往時文彩動人主此日飢寒趨路傍晚將
未契托年少當面輸心背面咲寄謝悠悠世上兒不
爭好惡莫相疑

劉云寫得徹
至懷抱如洗

醉歌行贈公安顏少府請顧公題壁

神仙中人不易得顏氏之子才孤標天馬長鳴待駕
馭秋鷹整翮當雲霄君不見東吳顧文學君不見西
漢杜陵老

劉云面前人着兩
不見唐突可人

詩家筆勢君不嫌詞翰

升堂爲君掃是日霜風凍七澤烏蠻落照銜赤壁酒
酣耳熱忘頭白感君意氣無所惜一爲歌行歌主客

戲題王宰畫山水圖歌

十日畫一水五日畫一石能事不受相促迫王宰始
肯留真跡壯哉崑崙方壺圖挂君高堂之素壁巴陵
洞庭日本東赤岸水與銀河通中有雲氣隨飛龍舟
人漁子入浦溆山木盡亞洪濤風尤工遠勢君莫比

咫尺應須論萬里焉得并州快剪刀剪取吳松半江水

高都護驄馬行

安西都護胡青驄聲價歛然來向東此馬臨陣久無

敵與人一心成大功劉云亦是精氣功成惠養隨所致飄飄

遠自流沙至雄姿未受伏櫪恩猛氣猶思戰場利劉云

此氣骨不可少腕促蹄高如踣鐵交河幾蹴層冰裂五花散

作雲滿身萬里方看汗流血長安壯兒不敢騎走過

掣電傾城知青絲絡頭為君老何由却出橫門道劉云

只如此語絕是

負薪行

夔州處女髮半華四十五十無夫家更遭喪亂嫁不

售一生抱恨堪咨嗟土風坐男使女立應當門戶女

出入十猶八九負薪歸賣薪得錢應供給至老雙鬢

只垂頸野花山葉銀釵並勸力登危集市門死生射

利兼鹽井面粧首飾雜啼痕地褊衣寒困石根若道

巫山女麤醜何得此有昭君村

最能行

峽中丈夫絕輕死少在公門多在水富豪有錢駕大

舸貧窮取給行艤子小兒學問止論語大兒結束隨

商旅歆帆側拖入波濤檝旋梢噴無險阻朝發白帝
暮江陵頃來目擊信有徵瞿塘漫天虎鬚怒歸州長
年行最能此鄉之人氣量窄誤競南風踈北客若道
上無英雄才何得山有屈原宅

寄栢學士林居

自胡之反持干戈天下學士亦奔波歎彼幽棲載典
籍蕭然暴露依山阿青山萬里靜散地白雨一洗空
垂蘿亂代飄零予到此古人成敗子如何荆楊春冬
異風土巫峽日夜多風雨赤葉楓林百舌鳴黃泥野
岸天雞舞盜賊縱橫甚密邇形神寂寞甘辛苦幾時
高議排金門各使蒼生有環堵

杜鵑行

君不見昔日蜀天子化爲杜鵑似老鳥寄巢生子不
自啄羣鳥至今爲哺雛雖同君臣有舊禮骨肉滿眼
身羈孤業工竄伏深樹裏四月五月偏號呼其聲哀
痛口流血所訴何事常區區爾豈摧殘始發憤羞帶
羽翮傷形愚蒼天變化誰料得萬事反覆何所無萬
事反覆何所無豈憶當殿羣臣趨

柟樹爲風雨所拔歎

倚江柟樹草堂前故老相傳二百年誅茅卜居總爲

此五月髣髴聞寒蟬東南飄風動地至江翻石走流
雲氣幹排雷雨猶力爭根斷泉源豈天意蒼波老樹
性所愛浦上童童一青蓋野客頓畱懼雪霜行人不
過聽竿籟虎倒龍顛委榛棘淚痕血點垂胞臆我有
新詩何處吟草堂自此無顏色

戲韋偃爲雙松圖歌

天下幾人畫古松畢宏已老韋偃少絕筆長松起織
未滿堂動色嗟神妙兩株慘裂苔蘚皮屈鐵交錯迴
高枝白摧朽骨龍虎死黑入太陰雷雨垂松根胡僧
憩寂寞龐眉皓首無住着偏袒右肩露雙腳葉裏松

子僧前落韋侯韋侯數相見我有一疋好東絹重之
不減錦繡段已令拂拭光凌亂請公放筆爲直幹

送孔巢父謝病歸遊江東兼呈李白

巢父掉頭不肯住東將入海隨煙霧詩卷長畱天地
間釣竿欲拂珊瑚樹深山大澤龍蛇遠春寒野陰風

景暮

劉云不必有所從來不必有所指玄又

玄衆妙門七字浩然以其將隱也

女迴雲車指點虛無引歸路自是君身有仙骨世人

那得知其故惜君只欲苦死畱

劉云兩君見賓主

富貴何如

草頭露蔡侯靜者意有餘清夜置酒臨前除罷琴惆
悵月照席幾歲寄我空中書南尋禹穴見李白道甫

問信今何如

劉云其迭蕩創體類自得意故成一家言

冬末以事之東都湖城遇孟雲卿復歸劉顥宅宿宴飲散因為醉歌

疾風吹塵暗河縣行子隔年不相見湖城城北一開
眼駐馬偶識雲卿面向非劉顥為地主懶迴鞭轡成
高宴劉侯歡我携客來置酒張燈促華饌且將款曲
終今夕休語艱難尚酣戰照室紅爐促曙光螢牕素
月垂文練天開地裂長安陌寒盡春生洛陽殿豈知
驅車復同軌可惜刻漏隨更箭人生會合不可常庭
樹鷄鳴淚如綫

陪王侍御同登東山最高頂宴姚通泉晚

攜酒泛江

姚公美政誰與儔不減昔時陳太丘邑中上客有柱
史多暇日陪驄馬遊東山高頂羅珍羞下顧城郭消
我憂清江白日落欲盡復攜美人登綵舟笛聲憤怨
哀中流妙舞逶迤夜未休燈前往往大魚出聽曲低
昂如有求三更風起寒浪湧取樂喧呼覺船重滿空
星河光破碎四座賓客色不動請公臨深莫相違迴
船罷酒上馬歸人生歡會豈有極無使霜露霑人衣

錦樹行

題自錦樹使人刮目

今日苦短昨日休歲云暮矣增離憂霜凋碧樹作錦
斲萬壑東逝無停畱荒戍之城石色古東郭老人住
青丘飛書白帝營斗粟琴瑟几杖柴門幽青草萋萋
盡枯死天驥跛足隨羸牛自古聖賢多薄命姦雄惡
少封公侯故國三年一消息終南渭水寒悠悠五陵
豪貴反顛倒鄉里小兒狐白裘生男墮地要膂力生
女富貴傾邦國莫愁父母少黃金天下風塵兒亦得

瘦馬行

東郊瘦馬使我傷骨骼硤兀如堵墻絆之欲動轉歌
側此豈有意仍騰驤細看六印帶宮字衆道三軍遺
路傍皮乾剝落雜泥滓毛若蕭條連雪霜去歲奔波
逐餘寇驕驕不慣不得將士卒多騎內廐馬惆悵恐
是病乘黃當時歷塊悞一蹶委棄非汝能周防見人
慘澹若哀訴失主錯莫無晶光天寒遠放鴈爲伴日
暮不收烏啄瘡誰家且養願終惠更試明年春草長

劉云展轉沈着忠厚惻怛感動千古

哀江頭

少陵野老吞聲哭春日潛行曲江曲江頭宮殿鎖千
門細柳新蒲爲誰綠憶昔霓旌下南苑苑中萬物生
顏色昭陽殿裏第一人同輦隨君侍君側輦前才人

帶弓箭白馬嚼齧黃金勒翻身向天仰射雲一箭正
墜雙飛翼明眸皓齒今何在血污遊魂歸不得清渭
東流劍閣深去住彼此無消息人生有情淚沾臆江
水江花豈終極黃昏胡騎塵滿城欲往城南忘城北

蘇子由云哀江頭篇詞氣如百金戰馬
注坡驀澗如履平地得詩人之遺法

樂遊園歌

公自注云晦日賀蘭揚長史筵
醉中作按西京雜記樂遊園

漢宣帝所立唐長安中太平公主於原上
置庭遊賞其地四望寬敞每上巳重陽士
夫於此被袂登高車馬填塞朝
士詞人賦詩翌日傳於京師

樂遊古園翠森爽煙綿碧草萋萋長公子華筵勢最
高秦川對酒平如掌長生木瓢示真率更調鞍馬狂

歡賞青春波浪芙蓉園白日雷霆夾城仗閶闔晴開

映蕩蕩曲江翠幕排銀榜拂水低垂舞袖翻綠雲清

切歌聲上劉云婉約有態却憶年年人醉時只今未醉已先

悲劉云語達自別數莖白髮那拋得百罰深盃亦不辭聖朝

亦知賤士醜一物自荷皇天慈此身飲罷無歸處獨

立蒼茫自咏詩劉云每誦此結不自堪
又云吾常墮淚於此

寄韓諫議注

今我不樂思岳陽身欲奮飛病在牀美人娟娟隔秋
水濯足洞庭望八荒鴻飛冥冥日月白青楓葉赤天
雨霜玉京羣帝集北斗或騎麒麟翳鳳凰芙蓉旌旗

煙霧落影動倒景搖瀟湘星宮之君醉瓊漿羽人稀
少不在傍似聞昨者赤松子恐是漢代韓張良昔隨
劉氏定長安帷幄未改神慘傷國家成敗吾豈敢色
難腥腐食楓香周南留滯古莫惜南極老人應壽昌
美人胡爲隔秋水焉得置之貢玉堂

劉云此篇多涉
茫恍惚幾失韓

注未竟
不合

飲中八仙歌

知章騎馬似乘船眼花落井水底眠汝陽三斗始朝
天道逢麴車口流涎恨不移封向酒泉左相日興費
萬錢飲如長鯨吸百川銜杯樂聖稱世賢

或作世
賢無文宗

之瀟灑美少年舉觴白眼望青天皎如玉樹臨風前
蘇晉長齋繡佛前醉中往往愛逃禪李白一斗詩百
篇長安市上酒家眠天子呼來不上船自稱臣是酒
中僊張旭三盃草聖傳脫帽露頂王公前揮毫落紙
如雲煙焦遂五斗方卓然高談雄辯驚四筵

蔡條西
清詩話

云此歌重疊用韵古無其體嘗質之叔父元度
云此歌分八篇人人各異雖重押韵無害亦三
百篇分章之意也劉云不倫不理各極其平
生極其醉趣古無此體無此妙謂爲八仙甚稱

驄馬行

公自注云太常良卿勅賜馬也
李鄧公愛而有之命甫製詩

鄧公馬癖人共知初得花驄大宛種夙昔傳聞思一
見牽來左右神皆竦雄姿逸態何蒼翠顧影嬌嘶自

矜寵隅目青熒夾鏡懸肉駿礮礪連錢動朝來少試
華軒下未覺千金滿高價赤汗微生白雪毛銀鞍却
覆香羅帕劉云無紫要
有風味卿家舊物公能取天廐真龍此
其亞晝洗須騰涇渭深朝趨可刷幽并夜吾聞良驥
老始成此馬數年人更驚豈有四蹄疾於鳥不與八
駿俱先鳴時俗造次那得致雲霧晦冥方降精近聞
下詔宣都邑肯使麒麟地上行

醉歌行

公自注從姪勤落第歸作此以別之

陸機二十作文賦汝更少年能綴文總角草書又神
速世上兒子徒紛紛驊騮作駒已汗血鷲鳥舉翮連

青雲詞源倒流三峽水筆陣獨掃千人軍只今年纔
十六七射策君門期第一舊穿楊葉真自知暫蹶霜
蹄未爲失偶然擢秀非難取會是排風有毛質汝身
已見唾成珠汝伯何由髮如漆春光淡沲秦東亭渚
蒲芽白水荇青風吹客衣日杲杲樹攪離思花冥冥
酒盡沙頭雙玉瓶衆賓已醉我獨醒乃知貧賤別更
苦吞聲躑躅涕淚零劉云人有此情寫
得不濃至而止

古栢行

孔明廟前有老栢柯如青銅根如石

范元實云此形似之語霜

皮溜雨四十圍黛色參天二千尺君臣已與時際會

樹木猶爲人愛惜雲來氣接巫峽長月出寒通雪山
白范元實云此激昂之語日昨路繞錦亭東先主武侯同閔宮
崔嵬枝幹郊原古窈窕丹青戶牖空落落盤踞雖得
地冥冥孤高多烈風扶持自是神明力正直元因造
化功大厦如傾瓦梁棟萬牛回首丘山重不露文章
世已驚未辭可伐誰能送苦心豈免容螻蟻香葉終
經宿鸞鳳去士幽人莫怨嗟古來材大難爲用

昔行

憶昔北尋小有洞洪河怒濤過輕舸辛勤不見華蓋
君良岑清輝慘么麼千崖無人萬壑靜二步回頭五

步坐秋山眼冷魂未歸仙賞心違淚交墮

劉云亦懇款數四

弟子誰依白茆室盧老獨啓青銅鎖巾拂香餘搗藥
塵階除灰死燒丹火玄圃滄洲莽空濶金節羽衣飄
婀娜落日初霞閃餘映倏忽東西無不可劉云恍松
風澗水聲合時青兕黃熊啼向我劉云岑寂語四句極俯仰形容之妙
徒然咨嗟撫遺跡至今夢想仍猶在秘節隱文須內
教晚歲何功使願果更討衡陽董鍊師南遊早鼓瀟
湘旒

冬狩行

公自注時梓州刺史章彝兼侍御史留後東川時章彝大閱東川公

以此詩諷其多殺仍勉其攘夷狄安王室

君不見東川節度兵馬雄校獵亦似觀成功夜發猛
士三千人清晨合圍步驟同禽獸已斃十七八殺聲
落日迴蒼穹幙前生致九青兒駝駝嶙峋垂玄熊東
西南北百里間髣髴蹴踏寒山空有鳥名鸚鵡力不
能高飛逐走蓬肉味不足登鼎俎胡爲見羈虞羅中
春蒐冬狩侯得同使君五馬一馬驄况今攝行大將
權號令頗有前賢風飄然時危一老翁十年厭見旌
旗紅喜君士卒甚整肅爲我回轡擒西戎草中狐兔
盡何益天子不在咸陽宮朝廷雖無幽王禍得不哀
痛塵再蒙嗚呼得不哀痛塵再蒙

哀王孫

毛深父曰時安祿山驚潼關上夜
半出延秋門諸王公主皆不及從
多爲賊所屠此
詩記而哀之

長安城頭頭白烏夜飛延秋門上呼又向人家啄大
屋屋底達官走避胡劉云起如童
謠省敘事處金鞭斷折九馬死
骨肉不待同馳驅腰下寶玦青珊瑚可憐王孫泣路
隅問之不肯道姓名但道困苦乞爲奴已經百日竄
荆棘身上無有完肌膚高帝子孫盡隆準龍種自與
常人殊豺狼在邑龍在野王孫善保千金軀不敢長
語臨交衢且爲王孫立斯須昨夜春風吹血腥東來
橐駝滿舊都朔方健兒好身手昔何勇銳今何愚竊

聞太子已傳位聖德北服南單于花門務面請雪耻
慎勿出口他人狙哀哉王孫慎勿踈五陵佳氣無時

無

劉云忠臣之盡心倉卒之隱語備盡情態

觀公孫大娘弟子舞劍器行 并序

大曆二年十月十九日夔州別駕元特宅見
臨穎李十二娘舞劍器壯其蔚跂問其所師
曰余公孫大娘弟子也開元三載余尚童稚
記於郾城觀公孫氏舞劍器渾脫瀏漓頓挫
獨出冠時自高頭宜春梨園二妓坊內人洎
出供奉曉是舞者聖文神武皇帝初公孫一

人而已玉貌繡衣况余白首今茲弟子亦匪
盛顏既辨其由來知波瀾莫二撫事慷慨聊
爲劍器行昔者吳人張旭善草書書帖數常
於鄴縣見公孫大娘舞西河劍器自此草書
長進豪蕩感激卽公孫可知矣

昔有佳人公孫氏一舞劍器動四方觀者如山色沮
喪天地爲之久低昂燿如羿射九日落矯如羣帝驂
龍翔來如雷霆收震怒罷如江海凝清光 劉云名絳狀得意
唇朱袖兩寂寞况有弟子傳芬芳臨穎美人在白帝
妙舞此曲神揚揚與余問答既有以感時撫事增惋

傷先帝侍女八千人公孫劍器初第一五十年間似
反掌風塵瀕洞昏王室梨園弟子散如煙女樂餘姿
映寒日金粟堆南木已拱瞿塘石城草蕭瑟玳筵急
管曲復終樂極哀來月東出老夫不知其所往足繭
荒山轉愁疾

劉云濃至慘黯如野笛中斷聞者自不堪也

蘇端薛復筵簡薛華醉歌

文章有神交有道端復得之名譽早

劉云第能此起不患辭窮愛

客滿堂盡豪傑開筵上日思芳草安得健步移遠梅
亂插繁花向晴昊千里猶殘舊冰雪百壺且試開懷
抱垂老惡聞戰鼓悲急觴爲緩憂心擣少年努力縱

談笑看我形容已枯槁座中薛華善醉歌歌辭自作

風格老近來海內爲長句汝與山東李白好

劉云此老歌行

之妙有不自知其所至者

何劉沈謝力未工才兼鮑照愁絕倒諸

生頗盡新知樂萬事終傷不自保

劉云可哀

氣酣日落西

風來願吹野水添金杯如澆之酒常快意亦知窮愁
安在哉忽憶雨時秋井塌古人白骨生青苔如何不

飲令心哀

劉云豪俠

漢陂行

岑參兄弟皆好奇携我遠來遊漢陂天地驕慘忽異
色波濤萬頃堆琉璃琉璃汗漫汎舟入事殊興極憂

思集鬣作鯨吞不復知惡風大浪何嗟及主人錦帆
相爲開舟子喜甚無氛埃鳧鷖散亂棹謳發絲管啁
啾空翠來沈竿續蔓深莫測菱葉荷花淨如拭宛在
中流渤澥清下歸無極終南黑半陂已南純浸山影
動裊窈冲融間舡舫暝憂雲際寺水回月出藍田關
劉云寫景入微煙波遠近變態具足此時驪龍亦吐珠馮夷擊鼓羣龍
趨湘如漢女出歌舞金支翠旗光有無咫尺但愁雷
雨至蒼茫不曉神靈意劉云慘愴之容窈眇之思尋常賦樂事則所經歷駭愕者置不復道吾常遊西湖遇風雨誦此語如同舟同時少壯幾時奈老何向來
哀樂何其多

奉先劉少府新畫山水障歌

堂上不合生楓樹怪底江山起煙霧聞君掃却赤縣
圖乘興遣畫滄洲趣畫師亦無數好手不可遇對此
融心神知君重毫素豈但祁岳與鄭虔筆跡遠過楊
契丹得非玄圃裂無乃瀟湘翻悄然坐我天姥下耳
邊已似聞清猿反思前夜風雨急乃是滿城鬼神入
元氣淋漓障猶濕真宰上訴天應泣野亭春還雜花
遠漁翁暝踏孤舟立滄浪水深青冥濶歌岸側島秋
毫末不見湘妃鼓瑟時至今斑竹臨江活劉侯天機
精愛畫入骨髓自有兩兒郎揮灑亦莫比大兒聰明

到能添老樹巔崖裏小兒心孔開貌得山僧及童子
若耶谿雲門寺吾獨胡爲在泥滓青鞋布襪從此始

劉云玄淡活脫自在 范德機云歌行之
奇清景絕者 又云古今題畫之律度也

韋諷錄事宅觀曹將軍畫馬圖引

國初以來畫鞍馬神妙獨數江都王劉云起得踈
鹵正合古意將
軍得名三十載人間又見真乘黃曾貌先帝照夜白
龍池十日飛霹靂內府殷紅馬腦盤婕妤傳詔才人
索盤賜將軍拜舞歸輕紈細綺相追飛貴戚權門得
筆跡始覺屏障生光輝昔日太宗拳毛騮近時郭家
獅子花今之新圖有二馬復令識者久歎嗟此皆騎

戰一敵萬縞素漠漠開風沙其餘七疋亦殊絕迥若
寒空動煙雪霜蹄蹴踏長楸間馬官廡養森成列可
憐九馬爭神駿顧視清高氣深穩借問苦心愛者誰
後有韋諷前支遁憶昔巡幸新豐宮翠華拂天來向
東騰驤磊落二萬疋皆與此圖筋骨同自從獻寶朝
河宗無復射蛟江水中劉云四句沈着雅麗政
在事記物事在言外君不
見金粟堆前松柏裏龍媒去盡鳥呼風劉云長篇意
外淪痛險絕

丹青引贈曹將軍霸

將軍魏武之子孫於今爲庶爲清門劉云起語激昂
慷慨少育及此
英雄割據雖已矣文采風流今尚存劉云接
得又暢學書初

學衛夫人但恨無過王右軍丹青不知老將至富貴

於我如浮雲劉云突兀四語能事志意畢竟往復浩蕩只在裏許又云自是筆意至此非思

致所及謝無勉云此自然開元之中常引見承恩

數上南薰殿凌煙功臣少顏色將軍下筆開生面良

相頭上進賢冠猛將腰間大羽箭褒公鄂公毛髮動

英姿颯爽來酣戰先帝天馬玉花驄畫工如山貌不

同是日牽來赤墀下迥立闈闔生長風劉云迥立詔

謂將軍拂絹素意匠慘淡經營中斯須九重真龍出

一洗萬古凡馬空洪容齋五筆云玉花却在御榻上

榻上庭前屹相向至尊含笑催賜金圍人大僕皆惆

悵弟子韓幹早入室亦能畫馬窮殊相幹惟畫肉不

畫骨恐使驕驕氣凋喪劉云將軍善畫益有神必逢

佳士亦寫真劉云謂未即今漂泊干戈際屢貌尋常

行路人途窮反遭俗眼白世上未有如公貧但看古

來盛名下終日坎壈纏其身劉云首尾悲壯

兵車行師古云此詩為唐玄宗用兵吐蕃而作託武帝以風刺也

車麟麟馬蕭蕭行人弓箭各在腰爺娘妻子走相送

塵埃不見咸陽橋牽衣頓足攔道哭哭聲直上干雲

霄道傍過者問行人行人但云點行頻或從十五北

防河便至四十西營田去時里正與裹頭歸來頭白

還戍邊邊庭流血成海水武皇開邊意未已君不見
 漢家山東二百州千村萬落生荆杞縱有健婦把鋤
 犁禾生隴畝無東西况復秦兵耐苦戰被驅不與犬
 與雞長者雖有問役夫敢申恨且如今年冬未休關
 西卒縣官急索租租稅從何出信知生男惡反是生
 女好生女猶得嫁比鄰生男埋沒隨百草君不見青
 海頭古來白骨無人收新鬼煩冤舊鬼哭天陰雨濕
 聲啾啾蔡寬夫詩話云齊梁以來文喜為樂府沿襲
 既久往往失其命題之意雖李白亦不免此
唯少陵兵車行等篇皆因事自出已意立
 題畧無蹈襲前人陳跡真所謂豪傑也

洗兵馬行

公自注云
收京後作

中興諸將收山東捷書夜報清晝同河廣傳聞一葦
 過胡危命在破竹中祗殘鄴城不日得獨任朔方無
 限功京師皆騎汗血馬回紇饑肉蒲萄宮已喜皇威
 清海岱常思仙仗過崆峒三年笛裏關山月萬國兵
 前草木風劉云悲壯少及成王功大心轉小郭相謀深古來
 少司徒清鑒懸明鏡尚書氣與秋天杳二三豪俊為
 時出整頓乾坤濟時了東走無復憶鱸魚南飛各有
 安巢鳥青春復隨冠冕入紫禁正耐煙花繞劉云有
 氣象有
風韻鶴駕通宵鳳輦備雞鳴問寢龍樓曉攀龍附鳳勢
 莫當天不盡化為侯王汝等豈知蒙帝力時來不得

誇身強

劉云事外句外常有餘力

關中既留蕭丞相幕下復用張

子房張公一生江海客身長九尺鬚眉蒼徵起適遇

風雲會扶顛始知籌策良青袍白馬更何有後漢今

周喜再昌寸地尺天皆入貢奇祥異瑞爭來送不知

何國致白環復道諸山得銀甕隱士休歌紫芝曲詞

人解撰河清頌田家望望惜雨乾布穀處處催春種

淇上健兒歸莫懶城南思婦愁多夢安得壯士挽天

河洗淨甲兵長不用

劉云此篇對律甚嚴而春容醞籍西清詩話云作詩者陶冶

物情體會光景必貴乎自得蓋格有高下才有分限不可強力致也譬之秦武陽氣蓋全燕見秦王則戰栗失色淮南王安雖為神仙謁帝猶輕其舉止此豈由素習哉予以謂少陵太白高

險阻艱難流離困躓意欲卑而語未嘗不高至於羅隱貫休輩得意於徧霸誇雕逞奇語欲高而意未嘗不卑乃知天稟自然有不能易也。

追酬故高蜀州人日見寄

并序

開文書帖中檢所遺忘因得故高常侍適往

居在成都時高任蜀州刺史人日相憶見寄

詩淚灑行間讀終篇末自枉詩已十餘年莫

記存沒又六七年矣老病懷舊生意可知今

海內忘形故人獨漢中王瑀與昭州敬使君

超先在愛而不見情見乎辭大曆五年正月

二十一日却追酬高公此作因寄王友敬第

自蒙蜀州人日作不意清詩久零落今晨散帙眼忽
開迸淚幽吟事如昨嗚呼壯士多慷慨合沓高名動
寥廓歎我悽悽求友篇感時鬱鬱匡君畧錦里春光
空爛熳瑤墀侍臣已冥寞瀟湘水國旁鼉鼉鄆杜秋
天失鷓鴣東西南北更堪論白首扁舟病獨存遙拱
北辰纏寇盜欲傾東海洗乾坤邊塞西蕃最克斥衣
冠南渡多崩奔鼓瑟至今悲帝子曳裾何處謁王門
文章曹植波瀾濶照食劉安德業尊長笛誰能亂愁
思昭州詞翰與招魂

七言古詩卷之四

唐詩品彙二十八

七言古詩卷之五

唐詩品彙二十九

新寧高 棟編輯

關中張 恂重訂

名家上

高適

行路難二首

長安少年不少錢能騎駿馬鳴金鞭五侯相逢大道
邊美人絃管爭留連黃金如斗不敢惜片言如山莫
棄捐安知憔悴讀書者暮宿靈臺私自憐

其二

君不見富家翁舊時貧賤誰比數一朝金多結豪貴
百事勝人健如虎子孫成行滿眼前妻能管絃妾能
舞自矜一身忽如此却咲傷人獨愁苦東陵少年安
所如席門窮巷出無車有才不肯學干謁何用年年
空讀書

邙鄆少年行

邙鄆城南遊俠子自矜生長邙鄆裏千場縱博家仍
富幾處報讐身不死宅中歌笑日紛紛門外車馬如
雲屯未知肝膽向誰是令人却憶平原居殷云余所
最深愛者
君不見今日交態薄黃金用盡還踈索以茲感歎辭

舊遊更於時事無所求且與少年飲美酒往來射獵

西山頭

古大梁行

卷之二十一

古城莽蒼饒荆榛驅馬荒城愁殺人魏王宮觀盡木
黍信陵賓客隨灰塵憶昨雄都舊朝市軒車照耀歌
鐘起軍容帶甲三十萬國步連營五千里全盛須臾
那可論高臺曲池無復存遺墟但見狐狸迹古地空
餘草木根暮天搖落傷懷抱撫劒悲歌對秋草俠客
猶傳朱亥名行人尚識夷門道白璧黃金萬戶侯
刀駿馬填山丘年代淒涼不可問往來惟見水東流

燕歌行

開元二十六年客有從元戎出塞而還者作
燕歌行以示適感征戍之事因而和焉

漢家煙塵在東北漢將辭家破殘賊男兒本自重橫
行天子非常賜顏色撻金伐鼓下榆關旌旆逶迤碣
石間校尉羽書飛瀚海單于獵火照狼山山川蕭條
極邊土胡騎憑陵雜風雨戰士軍前半歿生美人帳
下猶歌舞大漠窮秋塞草腓孤城落日鬪兵稀身當
恩遇常輕敵力盡關山未解圍鐵衣遠戍辛勤久玉
筋應啼別離後少婦城南欲斷腸征人薊北空回首
邊庭飄颻那可度絕域蒼茫無所有殺氣三時作陣
雲寒聲一夜傳刁斗相看白刃雪紛紛歿節從來豈
顧勳君不見沙場征戰苦至今猶憶李將軍

殷云甚
有奇句

漁父歌

曲岸深潭一山叟駐眼看釣不移手世人欲得知姓
名良久問他不開口筍皮笠子荷葉衣心無所營守
釣磯料得孤舟無定止日暮持竿何處歸

九月九日酬顏少府

簷前白日應可惜籬上黃花爲誰有行子迎霜未授
衣主人得錢始沽酒蘇秦憔悴人多厭蔡澤棲遲世

看醜縱使登高只斷腸不如獨坐空搔首

送別

昨夜離心正鬱陶三更白露西風高螢飛木落何淅
瀝此時夢見西歸客曙鐘寥亮三四聲東鄰嘶馬使
人驚攬衣出戶一相送惟見歸雲縱復橫

別李景參

離心忽悵然策馬對秋天子孟諸薄暮涼風起歸客相
逢度睢水昨時攜手已十年今日分途各千里歲物
蕭條滿路岐行浩蕩令人悲家貧羨爾有微祿欲
往從之何所之

送田少府貶蒼梧

沈吟對遷客惆悵西南天昔爲一官未得意今向萬
里令人憐念茲斗酒成睽間停舟歎君日將晏遠樹
應連北地春行人却羨南歸鴈丈夫窮達未可知看
君不合長數竒江山到處堪乘興楊柳青青那足悲

崔司錄宅宴大理李卿

多雨殊未已秋雲更沈沈洛陽故人初解印山東小
吏來相尋上卿才大名不朽早求至尊暮求友豁達
常推海內賢殷勤但酌樽中酒飲醉欲言歸剡溪門
前駟馬光照衣路傍觀者徒唧唧我公不以爲是非

贈別晉二處士

有人家住清河源渡河問我遊梁園手持道經注已
畢心知內篇口不言盧門十年見秋草此心惆悵誰
能道矣已從來不易知慕君爲人與君好別時九月
桑葉踈出門千里無行車愛君且欲君先達今上求
賢早上書

賦得還山吟送沈四山人

還山吟天高日暮寒山深送君還山識君心人生老
大須恣意看君解作一生事山間偃仰無不至石泉
淙淙若風雨桂花松子常滿地賣藥囊中應有錢還
山服藥又長年白雲勸盡杯中物明月相隨何處所
眠時憶問醒時事夢魂可以相周旋

送蔡山人

東山布衣明古今自言獨未逢知音識者閱見一生
事到處豁然千里心看書學劍長辛苦近日方思謁
明主斗酒相留醉復醒悲歌數年淚如雨丈夫遭遇
不可知買臣主父皆如斯我今蹭蹬無所似看爾崩
騰何可爲

人日寄杜二拾遺

人日題詩寄草堂遙憐故人思故鄉柳條弄色不忍

見梅花滿枝空斷腸
身在南蕃無所預
心懷百憂復千慮
今年人日空相憶
明年人日知何處
一臥東山三十春
豈知書劍老風塵
龍鐘還忝二千石
愧爾東西南北人

寄宿田家

田家老翁住東陂
說道平生隱在茲
髮白未曾記日月
山青每到識春時
門前種柳深成巷
野谷流泉添入池
牛壯日耕十畝地
人閑常掃一茆茨
客來滿酌清樽酒
感興平吟才子詩
巖際窟中藏鼯鼠
潭邊竹裏隱鷓鴣
村墟日落行人少
醉後無心怯路岐
今夜只應還寄宿
明朝拂曙與君辭

封丘縣

我本漁樵孟諸野
一生自是悠悠者
乍可狂歌草澤中
寧堪作吏風塵下
祗言小邑無所爲
公門百事皆有期
拜迎官長心欲碎
鞭撻黎庶令人悲
悲來向家問妻子
舉家盡笑今如此
生事應須南畝田
世情付與東流水
夢想舊山安在哉
爲銜君命日遲迴
乃知梅福徒爲爾
轉憶陶潛歸去來

別韋叅軍

二十解書劍
西遊長安城
舉頭望君門
屈指取公卿

國風冲融邁三五朝廷禮樂彌寰宇白屋皆言賜近
臣布衣不得干明主歸來洛陽無負郭東過梁宋非
吾土兔苑爲農歲不登鴈池垂釣心長苦世人向我
同衆人唯君於我最相親且喜百年見交態未嘗一
日辭家貧彈棋擊筑白日晚縱酒高歌楊柳春歡娛
未盡分散去使我惆悵驚心神丈夫不作兒女別臨
岐涕淚沾衣巾

送渾將軍出塞

將軍族貴兵且強漢家已是渾邪王子孫相承在朝
野至今部曲燕支下控弦盡用陰山兒登陣長騎大
宛馬銀鞍玉勒繡螭弧每逐嫖姚破骨都李廣從來
先將士衛青未肯學孫吳傳有沙場千萬騎昨日邊
庭羽書至城頭畫角三四聲匣裏寶刀晝夜鳴意氣
能甘萬里去辛勤動作一年行黃雲白草無前後朝
建旌旗夕刁斗塞下應多俠少年關西不見春楊柳
從軍借問所從誰擊劍酣歌當此時遠別無輕繞朝
策平戎早寄仲宣詩

岑參

蜀葵花歌

昨日一花開今日一花開今日花正好昨日花已老

人生不得恒少年莫惜牀頭沽酒錢請君有錢向酒家君不見蜀葵花

登古鄴城

下馬登鄴城城空復何見東風吹野火暮入飛雲殿城隅南對望陵臺漳水東流不復回武帝宮中人去盡年年春色爲誰來

贈酒泉韓太守

太守有能政遙聞如古人俸錢盡供客家計常清貧酒泉西望玉關道千年萬磧皆白草辭君走馬歸長安憶君倏忽令人老

韋員外家花樹歌

今年花似去年好去年人到今年老始知人老不如花可惜落花君莫掃君家兄弟不可當列卿御史尚書郎朝回花底恒會客花撲玉缸春酒香

題匡城周少府廳壁

婦姑城南風雨秋婦姑城中人獨愁愁雲遮却望鄉處數日不上西南樓故人薄暮公事閑玉壺美酒琥珀盤頽易秋草今黃盡醉臥君家猶未還

偃師東與韓尊同訪景雲暉上人卽事

山陰老僧解楞伽頽易歸客遠相過煙深草濕昨夜

卷之二十九
雨雨後秋風度漕河空山終日塵事少平郊遠見行人小尚書蹟上黃昏鐘別駕渡頭一歸鳥

邯鄲客舍歌

客從長安來驅馬邯鄲道傷心叢臺下一旦生蔓草
客舍門臨漳水邊垂楊下繫釣魚船邯鄲女兒夜沽
酒對客挑燈誇數錢酪酏醉時日正午一曲狂歌壚
上眠

漁父

扁舟滄浪叟心與滄浪清不自道鄉里無人知姓名
朝從灘上飯暮向蘆中宿歌竟還復歌手持一竿竹
竿頭釣絲長丈餘鼓棹乘流無定居世人那得識深
意此翁取適非取魚

送宇文南金放後歸大原寓居因呈大原

郝主簿

歸去不得意北京關路賒却投晉山老愁見汾陰花
翻作灞陵客憐君丞相家夜眠旅舍雨曉醉春城鴉
送君繫馬青門口胡姬壚頭勸君酒爲問大原賢主
人看來更有新詩否

喜韓尊相過

三月灞陵春已老故人相逢耐醉倒甕頭春酒黃花

脂祿米只充酤酒資長安城中足年少獨共韓侯開
口嘯桃花點地紅斑斑有酒留君且莫還與君兄弟
日攜手世上虛名好是閑

梁州館中與諸判官夜集

彎彎月出挂城頭城頭月出照梁州梁州七里十萬
家胡人半解彈琵琶琵琶一曲腸堪斷風蕭蕭今夜
漫漫河西幕中多故人故人別來三五春花門樓前
見秋草豈能貧賤相看老一生大嘯能幾回斗酒相
逢須醉倒

臨河客舍呈狄明府兄留題縣南樓

黎陽城南雪正飛黎陽渡頭人未歸河邊酒家堪寄
宿主人小女能縫衣故人高臥黎陽縣一別三年不
相見邑中雨雪偏着時隔河東郡人遙羨鄴都唯見
古時丘漳水還如舊日流城上望鄉應不見朝來好
是懶登樓

燉煌太守後亭歌

燉煌太守才且賢郡中無事高枕眠太守到來山出
泉黃沙磧裏人種田燉煌耆舊髯皤然願留太守更
五年城頭月出星滿天曲房置酒張錦筵美人紅粧
色正鮮側垂高髻挿金鈿醉坐藏鈎紅燭前不知鈎

在若箇邊爲君手把珊瑚鞭射得半段黃金錢此中
樂事亦已偏

秦箏歌送外甥蕭正歸京

汝不聞秦箏聲最苦五色纏絃十三柱怨調慢聲如
欲語一曲未終日移午紅亭水木不知暑忽彈黃鐘
和白紵清風颯來雲不去聞之酒醒淚如雨汝歸秦
今彈秦聲秦聲悲今聊送汝

胡笳歌送顏真卿使赴河隴

君不聞胡笳聲最悲紫髯綠眼胡人吹吹之一曲猶
未了愁殺樓蘭征戍兒涼秋八月蕭關道北風吹斷
天山草崑崙山南月欲斜胡人向月吹胡笳胡笳怨
今將送君秦山遙望隴山雲邊城夜夜多愁夢向月
胡笳誰喜聞

西亭子送李司馬

高高亭子郡城西直上千尺與雲齊盤崖緣壁試攀
躋羣山向下飛鳥低使君五馬天半嘶絲繩玉壺爲
君提坐來一望無端倪紅花綠柳鶯亂啼千家萬井
連回谿酒行未醉聞暮雞點筆操紙爲君題爲君題
惜解攜草萋萋沒馬蹄

函谷關歌送劉評事使關西

君不見函谷關崩城毀壁至今在樹根草蔓遮古道
空谷千年長不改寂寞無人空舊山聖朝無事不須
關白馬公孫何處去青牛老人更不還蒼苔白骨空
滿地月與古時長相似野花不省見行人山鳥何曾
識關吏故人方乘使者車吾知郭丹却不如請君時
憶關外客行到關西多致書

天山雪歌送蕭治歸京

天山雪雲常不開千峰萬嶺雪崔嵬北風夜卷赤亭
口一夜天山雪更厚能兼漢月照銀山復逐胡風過
鐵關交河城邊鳥飛絕輪臺路上馬蹄滑晝靄寒氛
萬里凝闌干陰崖千丈冰將軍狐裘臥不煖都護
刀凍欲斷正是天山雪下時送君走馬歸京師雪中
何以贈君別唯有青青松樹枝

走馬川行奉送封大夫出師西征

君不見走馬川行雪海邊平沙莽莽黃入天輪臺九
月風夜吼一川碎石大如斗隨風滿地石亂走匈奴
草黃馬正肥金山西見煙塵飛漢家大將西出師將
軍金甲夜不脫半夜軍行戈相撥風頭如刀面如割
馬毛帶雪汗氣蒸五花連錢旋作冰幕中草檄硯水
凝虜騎聞之應膽懾料知短兵不敢接軍師西門佇

獻捷

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠
黎單于已在金山西戍樓西望煙塵黑漢兵屯在輪
臺北上將擁旄西出征平明吹笛大軍行四邊伐鼓
雪海湧三軍大呼陰山動虜塞兵氣連雲屯戰場白
骨纏草根劍河風急雲片濶沙口石凍馬蹄脫亞相
勤王甘苦辛誓將報主靜邊塵古來青史誰不見今
見功名勝古人

白雲歌送武判官歸

北風卷地白草折胡天八月卽飛雪忽如一夜春風
來千樹萬樹梨花開散入珠簾濕羅幕狐裘不煖錦
衾薄將軍角弓不得控都護鐵衣難冷着瀚海闌干
百丈冰愁雲慘淡萬里凝中軍置酒飲歸客胡琴琵
琶與羌笛紛紛暮雪下轅門風掣紅旗凍不翻輪臺
東門送君去去時雪滿天山路山迴路轉不見君雪
上空留馬行處

青門歌送東臺張判官

青門金鎖平日開城頭日出使車回青門柳枝正堪
折路傍一日幾人別東出青門路不窮驛樓宮樹灞

陵東花撲征衣看似繡雲隨去馬色疑驄胡姬酒壚
日未午絲繩玉缸酒如乳灞頭落花沒馬蹄昨夜微
雨花成泥黃鸝翅濕飛屢低關東尺書醉懶題須臾
望君不可見揚鞭飛鞚疾如箭借問使乎何時來莫
作東飛伯勞西飛燕

梁園歌送河南王說判官

君不見梁孝王脩竹園頽墻隱麟勢仍存嬌娥慢臉
成草蔓羅帷朱簾空竹根大梁一旦人代改秋月春
風不相待池中幾度鴈新來洲上千年鶴應在

鶴池
鴈洲

梁園二月梨花飛却似梁王雪下時當時置酒

延枚叟肯料平臺狐兔走萬事翻覆如浮雲昔人空
在今人口單父古來稱宓生祇今爲政有吾兄

單父

輶軒若過梁園道應傍琴臺聞政聲

太白胡僧歌

并序

太白中峰絕頂有胡僧不知幾百歲眉長數
寸身不製繒帛衣以草葉恒持楞伽經雲壁
迥絕人迹罕到嘗東峰有鬪虎弱者將死僧
杖而解之西湫有毒龍久而爲患僧器而貯
之商山趙叟前年採茯苓深入太白偶值此
僧訪我而說余嘗有獨往之意聞而悅之乃

爲歌曰

聞有胡僧在太白蘭若去天三百尺一持楞伽入中
峰世人難見但聞鐘牕邊錫杖解兩虎床下鉢盂藏
一龍草衣不針復不線兩耳垂肩眉覆向此僧年幾
那得知手種青松今十圍心將流水同清淨身與浮
雲無是非商山老人已曾識願一見之何由得山中
有僧人不識城裏看山空黛色

范公叢竹歌

并序

職方郎中兼侍御史范公迺於陝西使院內
種竹新製叢竹歌以見示美范公之清致雅

操遂爲歌以和之

世人見竹不解愛知君種竹庭府內此君託根幸得
地種來幾時聞已大盛夏有爾叢色寒閑宵撼撼葉
聲乾能清案牘簾下見宜對琴書牕外看爲君成陰
將蔽日迸筴穿階踏還出守節偏凌御史霜虛心願
比郎官筆君莫愛南山松樹枝竹色四時也不移寒
天草木黃落盡猶自青青君始知

裴將軍宅蘆管歌

遼東九月蘆葉斷遼東小兒採蘆管可憐管新清且
悲一曲風飄海頭滿海樹蕭索天雨霜管聲寥亮月

蒼蒼白狼河北堪愁恨玄兔城南肯斷腸遼東將軍
長安宅美人蘆管會佳客弄調蕭颺勝洞簫發聲窈
窕欺橫笛夜半高堂客未回祇將蘆管送君盃巧能
陌上驚楊柳復向園中誤落梅諸客愛之聽未足高
卷珠簾列紅燭將軍醉舞不肯休更使美人吹一曲

衛節度赤驃馬歌

君家赤驃畫不得一團旋風桃花色紅纓紫韁珊瑚
鞭玉鞍錦韉黃金勒請君韉出看君騎尾長窄地如
紅絲自矜諸馬皆不及却憶百金初買時香街紫陌
鳳城內滿城見者誰不愛揚鞭驟急白汗流弄影行

驥碧蹄碎紫髯胡雛金剪刀平明剪出三駿高擡上
看時獨意氣衆中牽出偏雄豪騎將獵向南山口城
南狐兔不復有草頭一點疾如飛却使蒼鷹翻向後
憶昨看君朝未央鳴珂聲蓋滿路香始知邊將真富
貴可憐人馬相輝光男兒稱意得如此駿馬長鳴北
風起待君東去掃胡塵君一日行千里

送魏升卿擢第歸東都因懷魏校書陸渾
喬潭

井上梧桐雨灞亭卷秋風故人適戰勝匹馬歸山東
問君今年三十幾能使香名滿人耳君不見三峰直

上五千仞見君文章亦如此如君兄弟天下稀雄詞
健筆皆若飛將軍金印鞶紫綬御史鐵冠重繡衣高
生作尉別來久因君爲問平安否魏侯校理復何如
前日人來不得書陸渾山水佳可賞蓬閣閑時日應
往自料青雲未有期誰知白髮偏能長壚頭青絲白
玉瓶別時相顧酒如傾搖鞭舉袂忽不見千樹萬樹
空蟬鳴

送費子歸武昌

漢陽歸客悲秋草旅舍葉飛愁不掃秋來倍憶武昌
魚夢着祇在巴陵道曾隨上將過祁連離家十年常
在邊劍鋒可惜虛用盡馬蹄無事今已穿知君開館
恒愛客樗蒲百金每一擲平生有錢將與人江上故
園空四壁吾觀費子毛骨奇廣眉大口仍赤髭看君
失路尚如此人生貴賤那得知高秋八月歸南楚東
門一壺聊出祖路指鳳凰山北雲衣霑鸚鵡洲邊雨
勿歎蹉跎白髮新應須守道勿羞貧男兒何心戀妻
子莫向江村老却人

與獨孤漸道別長句兼呈嚴八侍御

輪臺客舍春草滿潁陽歸客腸堪斷窮荒絕漠鳥不
飛萬積千山夢猶懶憐君白馬一書生讀書千卷未

成名五貴侯門脚不到數畝山田身自耕興來浪迹
無遠近及至辭家憶鄉信無事垂鞭信馬頭西南幾
欲窮天盡奉使二年獨未歸邊頭詞客舊來稀借問
君來得幾日到家不覺換春衣高齋清晝卷羅幕紗
帽接籬慵不着中酒朝眠日色高彈棋夜半燈花落
冰片高堆金錯盤蒲堂凜凜五月寒桂林蒲桃新吐
蔓武城刺蜜未可餐軍中置酒夜搗鼓錦筵紅燭月
未午花門將軍善胡歌葉河蕃王能漢語知爾園林
壓渭濱夫人堂上泣羅裙魚龍川北磐谿雨烏鼠山
西洮水雲臺中嚴公於我厚別後新詩滿人口自憐
棄置天西頭因君爲問相思否

七言古詩卷之六

唐詩品彙三十

新寧高棟編輯

關中張恂重訂

名家下

李頎

古意

男兒事長征少小幽燕客
 賭勝馬蹄下由來輕七尺
 殺人莫敢前鬚如蝟毛
 磔黃雲隴底白雪飛未得報
 恩不能歸遼東小婦年十五
 慣彈琵琶解歌舞今為
 羌笛出塞聲使我三軍淚如雨

鮫人歌

鮫人潛織水底居側身上下隨遊魚輕綃文綵不可
織夜夜澄波連月色有時寄宿來城市海島青冥無
極已泣珠報恩君莫辭今年相見明年期始知萬族
無不有百尺深泉架戶牖鳥沒空山誰復望一望雲
濤堪白首

古從軍行

白首登山望烽火黃昏飲馬傍交河行人刁斗風沙
暗公主琵琶幽怨多野雲萬里無城郭雨雪紛紛連
大漠胡鴈哀鳴夜夜飛胡兒眼淚雙雙落聞道玉門

猶被遮應將性命逐輕車年年戰骨埋荒外空見蒲

入漢
人數家

古行路難

漢家名臣楊德祖四代五公享茅土父子兄弟綰銀
黃躍馬鳴珂朝建章火浣單衣繡方領茱萸錦帶玉
盤囊賓客填街復滿座片言出口生輝光世人逐勢
爭奔走瀝膽隳肝惟恐後當時一願登青雲自謂生
死長隨君一朝謝病還鄉里窮巷蒼苔絕知己秋風
落葉閉重門昨日論交竟誰是薄俗嗟嗟難重陳深
山麋鹿可爲鄰魯連所以蹈東海古往今來稱達人

鮫人歌

鮫人潛織水底居側身上下隨遊魚輕綃文綵不可
織夜夜澄波連月色有時寄宿來城市海島青冥無
極已泣珠報恩君莫辭今年相見明年期始知萬族
無不有百尺深泉架戶牖鳥沒空山誰復望一望雲
濤堪白首

古從軍行

白首登山望烽火黃昏飲馬傍交河行人刁斗風沙
暗公主琵琶幽怨多野雲萬里無城郭雨雪紛紛連
大漠胡鴈哀鳴夜夜飛胡兒眼淚雙雙落聞道玉門

猶被遮應將性命逐輕車年年戰骨埋荒外空見蒲
桃人數家

古行路難

漢家名臣楊德祖四代五公享茅土父子兄弟綰銀
黃躍馬鳴珂朝建章火浣單衣繡方領茱萸錦帶玉
盤囊賓客填街復滿座片言出口生輝光世人逐勢
爭奔走瀝膽隳肝惟恐後當時一願登青雲自謂生
死長隨君一朝謝病還鄉里窮巷蒼苔絕知己秋風
落葉閉重門昨日論交竟誰是薄俗嗟嗟難重陳深
山麋鹿可爲鄰魯連所以蹈東海古往今來稱達人

卷之三十一
二
緩歌行

小來託身攀貴游，傾財破產無所憂。莫擬經過石渠署，朝將出入銅龍樓。結交杜陵輕薄子，謂言可生復可死。一沉一浮會有時，棄我翻然如脫屣。男兒立身須自強，十年閉戶頽水陽。業就功成見明主，擊鐘鼎食坐華堂。二八蛾眉梳墮馬，美酒清歌曲房下。文昌宮中賜錦衣，長安陌上遇朝歸。五陵賓從莫敢視，三省官僚揖者稀。早知今日讀書是，悔作從來狂俠非。

王母歌

武皇齋戒承華殿，端拱須臾王母見。霓旌照耀麒麟車，羽蓋淋漓孔雀扇。手指玄梨遣帝食，可以長生臨寓縣。頭上復戴九星冠，總領玉童坐南面。欲聞要言今告汝，帝乃焚香請此語。若能鍊魄去三尸，後當見我天皇所顧謂。侍女董雙成，酒闌可奏雲和笙。紅霞白日儼不動，七龍五鳳紛相迎。惜哉志驕神不悅，歎息馬蹄與車轍。複道歌鐘杳將暮，深宮桃李飛成雪。爲看青玉五枝燈，蟠螭吐火光已絕。

送劉昱

八月寒葦花，秋江浪頭白。北風吹五兩，誰是潯陽客。鸕鷀山頭宿，雨晴揚州郭。裏暮潮生，行人夜宿金陵。

渚試聽沙邊有鴈聲

送從弟遊江淮兼謁鄱陽劉太守

都門柳色朝朝新
念爾今爲江上人
穆陵關帶清風
遠彭蠡湖邊芳草春
泊舟借問西林寺
曉聽猿聲在山翠
潯陽北望鴻鴈回
湓水東流客心醉
須知聖代舉賢良
不使遺才滯一方
應見鄱陽虎符守
思歸共指白雲鄉

夏宴張兵曹東堂

重林華屋堪避暑
况乃烹鮮會佳客
主人三十朝大夫
滿座森然見矛戟
北牕臥簟蓮心花
竹裏蟬鳴西日斜
羽扇搖風却珠汗
玉盆貯水割甘瓜
雲峰峨峨自冰雪
坐對芳尊不知熱
醉來但挂葛巾眠
莫道明朝有離別

崔五六圖屏風各賦一物得烏孫佩刀

烏孫腰間佩兩刀
刃可吹毛錦爲帶
握中枕宿穹廬室
馬上割飛翳
螭塞執之魍魎
誰能前氣凜清風
沙漠邊磨用陰山
一片玉洗將胡地
獨流泉主人屏風
寫奇狀鐵鞘金環
儼相向回頭瞪目
時一看使予心在江湖上

愛敬寺古藤歌

古藤池水盤樹根左攫右拏龍虎蹲橫空直上相陵
突丰茸離纏若無骨風雷霹靂連黑枝人言其下藏
妖魘空庭落葉乍開合十月苦寒常倒垂憶昨花飛
滿空殿密葉吹香飯僧遍南階雙桐一百尺相與年
年老霜霰

欲之新鄉答崔顥綦母潛

數年作吏家屢空誰道黑頭成老翁男兒在世無產
業行子出門如轉蓬吾屬交歡此何夕南家擣衣動
歸客銅鑪將炙相歡飲星宿縱橫露華白寒風卷葉
度滹沱飛雪布地悲峨峨孤城日落見棲鳥馬上時

聞漁者歌明朝東路把君手臘日辭君期歲首自知
寂寞無去思敢望縣人致牛酒

送康洽入京進樂府歌

識子十年何不遇只愛歡遊兩京路朝吟左氏嬌女
篇夜誦相如美人賦長安春物舊相宜小苑蒲萄花
滿枝柳色偏濃九華殿鶯聲醉殺五陵兒曳裾此夜
從何所中貴由來盡相許白袂春衫仙吏贈烏皮隱
几臺郎與新詩樂府唱堪愁御妓應傳鳩鵲樓西上
雖因長公主終須一見曲陵侯

送劉十

三十不官亦不娶時人焉識道高下房中惟有老氏
經櫪上空餘少游馬往來嵩華與函秦放歌一曲前
山春西林獨鶴引閑步南澗飛泉清角巾前年上書
不得意歸臥東山兀然醉諸兄相繼掌青史第五之
名齊驃騎烹葵摘果告我行落日夏雲縱復橫聞道
謝安掩口咲知君不免爲蒼生

送陳章甫

四月南風大麥黃棗花未落桐葉長青山朝別暮還
見嘶馬出門思舊鄉陳侯立身何坦蕩虬鬚虎眉仍
大顙腹中貯書一萬卷不肯低頭在草莽東門酤酒
飲我曹心輕萬事如鴻毛醉臥不知白日暮有時空
望孤雲高長河浪頭連天黑津吏停舟渡不得鄭國
游人未及家洛陽行子空歎息聞道故林相識多罷
官昨日今如何

放歌行答從弟異卿

小來好文耻學武世上功名不解取雖沾寸祿已後
時徒欲出身事明主栢梁賦詩不及宴長楸走馬誰
相數歛迹俛眉心自甘高歌擊節聲半苦由是蹉跎
一老夫養雞牧豕東城隅空歌漢代蕭相國肯事霍
家馮子都徒爾當年聲籍籍濫作詞林兩京客故人

斗酒安陵橋黃鳥春風洛陽陌吾家令弟才不羈五
言破的人共推興來逸起如濤湧千里長江歸海時
別離短景何蕭索佳句相思能間作舉頭遙望魯陽
山木葉紛紛向人落

別梁錕

梁生倜儻心不羈途窮氣益長安兒回頭轉眄侶鵬
鷗有志飛鳴人豈知雖云四十無祿位曾與大軍掌
書記抗辭請刃誅部曲作色論兵犯二帥一言不合
龍額疾擊劍拂衣從此棄朝朝飲酒黃公壚脫帽露
頂爭叫呼庭中擯鼻昔常掛懷裏琅玕今在無時人

見子多落魄共咲狂歌非遠圖忽然遣躍紫駟馬還
是昂藏一丈夫洛陽城頭曉霜白層冰峨峨滿川澤
但聞行路吟新詩不歎舉家無儋石莫言貧賤長可
欺齊身成山當有時莫言富貴長可託木槿朝看暮
還落不見古時塞上翁倚仗由來任天作去去滄波
勿復陳五湖三江愁殺人

聽董大彈胡笳兼寄語弄房給事

按唐史董庭蘭

善鼓琴爲房琯門客天寶五載琯攝給事中此詩疑贈庭蘭而兼寄次律之作也

蔡女昔造胡笳聲一彈一十有八拍胡人落淚沾邊
草漢使斷腸對歸客古戍蒼蒼烽火寒大荒陰沈飛

雪白先拂商絃後角羽四郊秋葉驚撼撼董夫子通
神明深松竊聽來妖精言遲更速皆應手將往復旋
如有情空山百鳥散還合萬里浮雲陰且晴嘶酸雛
鴈失羣夜斷絕胡兒戀母聲川爲淨其波鳥亦罷其
鳴烏珠部落家鄉遠羅娑沙塵哀怨生幽音變調忽
飄灑長風吹林雨墮瓦迸泉颯颯飛木末野鹿呦呦
走堂下殷云足可欬
獻震蕩心神長安城連東掖垣鳳凰池對青
瑣門高才脫畧名與利日夕望君抱琴至

王維

魚山神女祠歌

離騷作魚山迎
送神曲二首

坎坎擊鼓魚山之下吹洞簫望極浦女巫進紛屢舞
陳瑤席湛清醑風淒淒今夜雨神之來兮不來使我
心兮苦復苦

右迎神曲

紛進拜兮堂前日眷眷兮瓊筵來不語兮意不傳作
暮雨兮愁空山悲急管兮繁絃靈之駕兮儼欲旋倏
雲收兮雨歇山青青兮水潺湲

右送神曲

送友人歸山歌二首

離騷作
山中人

山寂寂兮無人又蒼蒼兮多木羣龍兮滿朝君何爲
兮空谷文寡和兮思深道難知兮行歎悅石上兮流
泉與松間兮草屋入雲中兮養雞上山頭兮抱犢神

與棗兮如瓜虎賣杏兮收穀愧不才兮妨賢嫌既老
兮貪祿誓解印兮相從何詹尹兮可卜

劉云不用楚調自適目前

詞少而意多尚覺盤谷歌意爲凡

其二

山中人兮欲歸雲冥冥兮雨霏霏水驚波兮翠管靡
白鷺忽兮翻飛君不可兮褰衣山萬重兮一雲混天
地兮不分樹晻曖兮氛氳嶺不見兮空聞忽山西兮
夕陽見東臯兮遠村平蕪綠兮千里眇惆悵兮思君

宋玉之下淵明之上甚似晉人不知者以爲氣短知者以爲琴操之餘音也

登樓歌

聊上君兮高樓飛薨鱗次兮在下俯十二兮通衢綠
槐參差兮車馬却瞻兮龍首前眺兮宜春王畿鬱兮
千里山河壯兮咸秦舍人下兮青宮據胡牀兮書空
執戟疲兮於下位老夫好隱兮墻東亦幸有張伯英
草聖兮龍騰虬躍擺長雲兮換回風琥珀酒兮雕胡
飯君不御兮日將晚秋風兮吹衣夕鳥兮爭返孤砧
發兮東城林薄暮兮蟬聲遠時不可兮再得君何爲
兮偃蹇

隴頭吟

長城少年游俠客夜上戍樓看太白隴頭明月尚臨

關隴上行人夜吹笛關西老將不勝愁駐馬聽之雙
淚流曾經大小百餘戰麾下偏裨萬戶侯蘇武纔爲
典屬國節旄空落海西頭

劉云次第轉折恨惋何限又非長篇所及

夷門歌

七國雄雌猶未分攻城殺將何紛紛秦兵益圍邯鄲
急魏王不救平原君公子爲嬴停駟馬執轡逾恭意
逾下亥爲屠肆鼓刀人嬴乃夷門抱關者非但慷慨
獻奇謀意氣兼將身命酬向風刎頭送公子七十老
翁何所求

洛陽女兒行

時年十八

洛陽女兒對門居纔可顏容十五餘良人玉勒乘
馬侍女金盤膾鯉魚畫角朱樓盡相望紅桃綠柳垂
簷向羅帷送上七香車寶扇迎歸九華帳狂夫富貴
在青春意氣驕奢劇季倫自憐碧玉親教舞不惜珊
瑚持與人春牕曙滅九微火九微片片飛花璪戲罷
曾無理由時粧成祇是薰香坐城中相識盡繁華日
夜經過趙李家將憐越女顏如玉貧賤江頭自浣紗

燕支行

漢家大將才且雄來時謁帝明光宮萬乘親推雙闕
下千官出餞五陵東誓辭甲第金門裏身作長城玉

塞中衛霍纔堪一騎將朝廷不數貳師功趙魏燕韓
多勁卒關西俠少何咆嘯報讐只是聞嘗膽餽酒不
曾妨刮骨畫戟雕戈白日寒連旗大旆黃塵沒疊鼓
遙翻瀚海波鳴笳亂動天山月麒麟錦帶佩吳鈎颯
踏青驪躍紫騮拔劍已斷天驕臂歸鞍共飲月支頭
漢兵大呼一當百虜騎相看哭且愁教戰須令赴湯
火終知上將先伐謀

老將行

少年十五二十時步行奪取胡馬騎射殺山中白額
虎肯數鄴下黃鬚兒一身轉戰三千里一劍曾當百

萬師漢兵奮迅如霹靂虜騎崩騰畏蒺藜衛青不敗
由天幸李廣無功緣數竒自從棄置便衰朽世事蹉
跎成白首昔時飛箭無全目今日垂楊生左肘路傍
時賣故侯瓜門前學種先生柳蒼茫古木連窮巷寥
落寒山對虛牖劉云愈出愈竒誓令踈勒出飛泉不似潁川
空使酒賀蘭山下陣如雲羽檄交馳日夕聞節使三
河募年少詔書五道出將軍試拂鐵衣如雪色聊持
寶劍動星文願得燕弓射天將耻令越甲鳴吾君莫
嫌舊日雲中守猶堪一戰立功勳劉云滿篇風致收拾處常嫩而短使

人情事欲絕又云起
結驕傲復勝老語

桃源行 時年十九

漁舟逐水愛山春兩岸桃花夾去津坐看紅樹不知
 遠行盡清谿不見人山口潛行始隈隩山開曠望旋
 平陸遙看一處攢雲樹近入千家散花竹樵客初傳
 漢姓名居人未改秦衣服居人共住武陵源還從物
 外起田園月明松下房櫳靜日出雲中雞犬喧驚聞
 俗客爭來集競引還家問都邑平明闔巷掃花開薄
 暮漁樵乘水入初因避地去人間更問成仙遂不還
 峽裏誰知有人事世中遙望空雲山不疑靈境難聞
 見塵心未盡思鄉縣出洞無論隔山水辭家終擬長
 遊行自謂經過舊不迷安知峰壑今來變當時只記
 入山深青谿幾度到雲林春來遍是桃花水不辨仙
 源何處尋

望終南贈徐中書

晚下兮紫薇悵塵事兮多違駐馬兮雙樹望青山兮
 不歸

答張五弟

終南有茅屋前對終南山終年無客長閉關終日無
 心長自閑不妨飲酒復垂釣君但能來相往還

寄崇梵僧

崇梵僧崇梵僧秋歸覆金春不還落花啼鳥紛紛亂
澗戶山牕寂寂閑峽裏誰知有人事郡中遙望空雲
山

寒食城東卽事

清谿一道穿桃李演漾綠蒲涵白芷谿上人家凡幾
家落花半落東流水蹴踘屢過飛鳥上鞦韆競出垂
楊裏少年分日作遨遊不用清明兼上巳

劉云自是活動

同崔傳答賢弟

洛陽才子姑蘇客杜宛姝非故鄉陌九江楓樹幾回
青一片揚州五湖白揚州時有下江兵蘭陵鎮前吹
笛聲夜火人歸富春郭秋風鶴唳石頭城周郎陸弟
爲儔侶對舞前谿歌白紵曲几書畱小史家草堂基
賭山陰墅衣冠若話外臺臣先數夫君席上珍更聞
臺閣求三語遙想風流第一人

送李睢陽

將置酒思悲翁使君去出城東麥漸漸雉子斑槐陰
陰到潼關騎連連車遲遲心中悲宋又遠周間之南
淮夷東齊兒碎碎織練與素絲遊人賈客信難持五
穀前熟方可爲下車閉閣君當思天子當殿儼衣裳
大官尚食陳羽觴彤庭散綬垂明璫黃紙詔書出東

廂輕紈疊綺爛生光宗室子弟君最賢分憂當爲百
辟先布衣一言相爲死何況聖主恩如天鸞聲噦噦
魯侯旗明年上計朝京師須憶今日斗酒別慎勿富
貴忘我爲

崔顥

七夕詞

長安城中月如練家家此夜持針線仙裙玉佩空自
知天上人間不相見長信深陰夜轉幽玉階金閤數
螢流斑姬此夕愁無限河漢三更看斗牛

鴈門胡人歌

高山代郡東接燕鴈門胡人家近邊解放胡鷹逐塞
鳥能騎代馬獵秋田山頭野火寒多燒雨裡孤峰濕
作煙聞道遼西無鬪戰時時醉向酒家眠

長安道

河岳英靈作
霍將軍軍篇

長安甲第高入雲誰家居住霍將軍日晚朝回擁賓
從路傍拜揖何紛紛莫言執手手可熱須臾火盡灰
亦滅莫言貧賤即可欺人生富貴自有時一朝天子
賜顏色世事悠悠應始知

孟門行

黃雀銜黃花翩翩傍簷隙本擬報君恩如何反彈射

金罍美酒滿座春平原愛才多衆賓滿堂盡是忠義
士何意得有纔諛人諛言反復那可道能令君心不
自保北園新栽桃李枝根株未固何轉移成陰結實
君自取若問傍人那得知

代閨人答輕薄少年

妾家近隔鳳凰池粉壁紗牕楊柳垂本期漢代金吾
婿誤嫁長安遊俠兒兒家夫婿多輕薄借客探九重
然諾平明挾彈入新豐日晚揮鞭出長樂青絲白馬
冶遊園能使行人駐馬看自矜陌上繁華盛不念閨
中花鳥闌花間陌上春將晚走馬鬪雞猶未返三時

出望無消息一云那知行近遠桃李花開覆井欄朱
樓落日捲簾看愁來欲奏相思曲抱得秦箏不忍彈

行路難

君不見建章宮裏金明枝萬萬長條拂地垂二月三
月花如霰九重深幽君不見艷彩朝含四寶宮香風
吹入朝雲殿漢家宮女春未闌愛此芳春朝暮看來
看去看心不忘攀折將安鏡臺上雙雙素手剪不成
兩兩紅粧咲相向建章昨夜起春風一花飛入長信
宮長信麗人見花泣憶此珍樹何嗟及我昔初在昭
陽時朝攀暮折登玉墀只言歲歲長相對不悟今朝

遙相思

渭城少年行

洛陽二月梨花飛秦地行人初憶歸揚鞭走馬城南
陌朝逢驛使秦川客驛使前日發章臺傳道長安春
早來棠梨宮中燕初至蒲萄館裏花正開念此使人
歸更早三月便達長安道長安道上春可憐搖風蕩
日曲江邊萬戶樓臺臨渭水五陵花柳滿秦川秦川
寒食盛繁華遊客春來不到家鬪雞下社塵初合走
馬章臺日未斜章臺帝城稱貴里青樓日晚歌鐘起
貴里豪家白馬騎五陵年少不相饒雙雙挾彈來金

市兩兩鳴鞭上渭橋渭城壚頭酒新熟金鞍白馬誰
家宿可憐錦瑟爭琵琶玉壺清酒就君家小婦春來
不解羞嬌歌一曲楊柳花

劉云崔顥落落酣歌自得刻削乃不能及

江邊老人愁

江南少年十八九乘舟欲渡清谿口忽逢江邊一老
翁鬚眉皓白已衰朽自言家代仕梁陳垂紫拖金三
十人兩朝出將復入相五世疊鼓乘朱輪父兄三葉
皆尚王女子四代爲妃嬪南山賜田接御苑北宮甲
第連紫宸直言榮華未休歇不覺山崩海將竭兵戈
亂入建康城煙火連燒未央闕衣冠女子陷鋒刃良

將名臣盡埋沒山川改易失朝市衢路縱橫填白骨
老人此時尚少年脫身走得投海邊罷兵歲餘未敢
出去家三載方來旋蓬蒿忘却五城宅草木不識清
谿田雖然得歸到鄉土零丁貧賤長辛苦采樵屢入
歷陽山川稻長過新林浦少年欲知老人歲豈知今
年一百五君今少壯我已衰我昔少年君不覩人生
貴賤各有時莫見羸老相輕欺感君相問爲君說說
罷不覺令人悲

七言古詩卷之六

唐詩品彙二十一

七言古詩卷之七

唐詩品彙二十一

新寧高 棟編輯

關中張 恂重訂

羽翼

孟浩然

夜歸鹿門歌

山寺鳴鐘晝已昏漁梁渡頭爭渡喧人隨沙岬向江
村余亦乘舟歸鹿門鹿門月照開煙澗忽到龐公栖
隱處巖扉松逕長寂寥唯有幽人自來去

送王七尉松滋

君不見巫山神女作行雲
霏紅沓翠曉氛氳
嬋娟流入襄王夢
倏忽還隨零雨分
空中飛去復飛來
朝朝暮暮下陽臺
愁君此去爲仙尉
便逐行雲去不回

高陽池送朱二

當昔襄陽全盛時
山公常醉習家池
池邊釣女日相隨
粧成照水競來窺
紅波澹澹芙蓉發
綠岸毵毵楊柳垂
一朝物變人亦非
四面荒涼人住稀
意氣豪華何處在
空餘草露濕人衣
此地朝來餞行者
翻向此中牧征馬
征馬分飛漸日斜
見此空爲人所嗟
殷勤爲訪桃源客
余亦歸來松子家

萬楚

小山歌

人說淮南有小山
淮王昔日此登仙
城中雞犬皆飛去
山上壇場宛然在
世人貴身不貴壽
共咲華陽洞天口
不知金石變長年
謾在人間戀攜手
君能舉帆至淮南
家住盱眙余先諳
桐栢亂流平入海
茱萸一曲沸成潭
憶記來時魂悄悄
想見仙山衆峰小
今日長歌思不堪
君行爲報三春鳥

丁仙芝

餘杭醉歌贈吳山人

曉幙紅襟鷺春城白項烏只來梁上語不向府中趨
城頭坎坎鼓聲曙滿庭新種櫻桃樹桃花昨夜撩亂
開當軒發色映樓臺十二元得餘杭酒二月春城長
命杯酒後留君待明月還將明月送君回

劉復

長相思

長相思在桂林蒼梧山遠瀟湘深秋堂零淚倚金瑟
朱顏搖落隨光陰長宵嘹唳鴻命侶河漢蒼蒼隔牛
女寧知一水不可渡況復萬山脩且阻綵絲織綺文
雙鴛昔時贈君君可憐何言一去瓶落井流塵歇滅

金爐前

長歌行

淮南木落秋雲飛楚宮商歌今正悲青春白日不與
我當壚舉酒勸君持出門驅驅四方事徒用辛勤不
得意三山海底無見期百齡世間莫虛棄君不見金
城帝業漢家有東制諸侯欲長久姦雄竊命風塵昏
函谷重關不能守龍蛇出沒經兩朝胡虜憑陵大道
銷河水東流宮闕盡五陵松柏自蕭蕭

儲光羲

新豐主人

新豐主人新酒熟舊客還歸舊堂宿滿酌香含北砌
花盈尊色泛南軒竹雲散天高秋月明東家少女解
秦箏醉來忘却巴陵道夢中疑似洛陽城

劉云跌
岩殊態

登戲馬臺作

君不見宋公杖鉞誅燕后英雄踴躍爭趨走小會衣
冠呂梁壑大徵甲卒礪礪口天門神武樹元勳九日
茱萸饗六軍泛泛樓船遊極浦搖搖歌吹動浮雲居
人滿目市朝變霸業猶存齊楚甸泗水南流桐栢川
沂山北走瑯琊縣滄海沈沈晨霧開彭城烈烈秋風
來少年自言未得意日暮蕭條

臺

薔薇

裊裊長數尋青青不作林一莖獨秀當庭心數枝分
作滿庭陰春日遲遲欲將半庭影離離正堪玩枝上
嬌鶯不畏人葉底飛蛾自相亂秦家女兒愛芳菲畫
眉相伴采葳蕤高處紅鬚欲就手低邊綠刺已牽衣
蒲桃架上朝光滿楊柳園中暝鳥飛連袂踏歌從此
去風吹香氣逐人歸

劉云轉換流麗可
歌可舞皆切題語

同張侍御燕北樓

今之太守古諸侯出入雙旌垂七旒朝覽干戈時聽
訟暮延賓客復登樓西山漠漠崦嵫色北渚沈沈江

漢流良宵清淨方高會繡服光輝聯皂蓋魚龍恍惚
堦墀下雲霧杳冥牕戶外水靈慷慨行泣珠遊女飄
颻思解珮蒼蒼低月半遙城落落疎星滿太清不忍
開襟悲楚奏願言吹笛退胡兵軒后青丘埋猋獫周
王白羽掃攙搶期君武節朝龍闕余亦翱翔歸玉京

張謂

殷璠曰謂代北州老翁答又湖中對酒行
在物情外但眾人未曾說耳亦何必歷選
遠探古迹然
後始為真搜

贈喬林

去年上策不見收今年寄食仍淹留羨君有酒能便

醉羨君無錢能不憂如今五侯不待客羨君不入五

侯宅如今七貴方自尊羨君不過七貴門丈夫會應

有知己世上悠悠安足論劉云可想其人

湖中對酒作

夜坐不厭湖上月晝行不厭湖上山劉云便覺楚楚眼前一

樽又常滿心中萬事如等閑主人有黍萬餘石濁醪

數斗應不惜即今相對不盡歡別後相思復何益菜

萸灣頭歸路賒願君且宿黃公家風光若此人不醉

參差辜負東園花

代北州老翁答

卷之三十一
負薪老翁住北州北望鄉關生客愁自言老翁有三
子兩人已向黃沙死如今小兒新長成明年聞道又
徵兵定知此別必零落不及相隨同死生盡將田宅
借鄰伍且復伶俜去鄉土在生本求多子孫及有誰
知更辛苦近傳天子尊武臣強兵直欲靜胡塵安邊
自合有長策何必流離中國人

邵陵作

嘗聞虞帝苦憂人祗爲蒼生不爲身已道一朝辭北
極何須五月更南巡昔時文武皆銷鑠今日精靈長
寂寞斑竹年來筍自生白蘋春盡花空落遙望雲陵
見舊丘蒼梧雲起至今愁唯餘帝子千行淚添作瀟
湘萬里流

王昌齡

城傍曲

秋風鳴桑條草白狐兔驕邯鄲飲來酒未消城北原
平掣皂鵬射殺空營兩騰虎迴身却月佩弓鞘

鳥栖曲

白馬逐牛車黃昏入狹斜狹斜柳樹烏爭宿爭枝未
得飛上屋東房少婦婿從軍每聽烏啼知夜分

行路難

雙絲作縷繫銀瓶百尺寒泉轆轤上懸絲一絕不可
望似妾傾心在君掌人生意氣好遷捐只重狂花不
重賢宴罷調箏奏離鶴迴嬌轉盼泣君前君不見眼
前事豈保須臾勿無異西山日下雨足稀側有浮雲
無所寄但願莫忘前者言剉骨黃塵亦無媿行路難
勸君酒莫辭煩美酒千鍾猶可盡心中片恨何可論
一聞漢主思故劍使妾長嗟萬古魂

箏篴引

盧谿郡南夜泊舟夜聞兩岸羌戎謳其時月黑猿啾
啾微雨霑衣令人愁有一遷客登高樓不言不寐彈
箏篴彈作薊門桑葉秋風沙颯颯青塚頭將軍鐵
汗血流深入匈奴戰未休黃旗一點兵馬收亂殺胡
人積如丘瘡病驅來役邊州仍披漠北羔羊裘顏色
飢枯掩面羞眼眶淚滴深兩眸還思本鄉食菴牛欲
語不得指咽喉或有強壯能呻吟意說被他邊將讐
五世屬藩漢主畱碧毛氊障河曲遊橐駝五萬部落
稠勅賜飛凰金兜鍪爲君百戰如過籌靜掃陰山無
鳥投家藏鐵券特承優黃金百觔不稱求九族分離
作楚囚深谿寂寞絃苦幽草木悲感聲颼颼僕本東
山爲國憂明光殿前論九疇篴讀兵書盡冥搜爲君

掌上施權謀洞曉山川無與儔紫宸詔發遠懷柔搖
筆飛霜如奪鈎鬼神不得知其由憐愛蒼生比蚍蜉
朔河屯兵須漸抽盡遣降來拜御溝便令海內休戈
矛何用班超定遠侯史臣書之得已不

奉贈張荊州

祝融之峰紫雲銜翠如何其雪嶺巖邑西有路緣石
壁我欲從之臥窮嵌魚有心兮脫網罟江無人兮鳴
楓杉王君飛鳥仍未去蘇耽宅中意遙緘

張南容

靜女歌

靜女樂於靜動合古人則妙年工詩書弱歲勤組織
端居愁若癡誰復理容色十五坐幽閨四鄰不相識
天天鄰家子百花裝首飾日日淇上游笑人不踰闕
河水自濁濟自清仙臺蛾眉秦鏡明爲照齊王門下
醜何如漢帝掌中輕

畢耀

情人玉清歌

文苑英華作
張南容詩

洛陽城中有一人名玉清可憐玉清如其名善踏斜
柯能獨立嬋娟花艷無人及珠爲幌玉爲纓臨春風
吹玉笙悠悠滿天星黃樂府作萬金閣上晚粧成雲和曲

中爲曼一作慢聲玉梯不得踏
搖袂兩盈盈
城頭之日復何情

賀蘭進明

行路難五首

殷璠云員外行路難五首益多雜興

君不見東流水一去無窮已
君不見西郊雲日夕
空氛氲羣鴈徘徊不能去
一鴈悲鳴復失羣
人生結交在終始
莫以升沈中路分

其二

君不見雲中月
暫盈還復缺
君不見林下風
聲遠意難窮
親故平生或聚散
歡娛未盡尊酒空
歎息青青

陵上栢歲寒能有幾人同

其三

君不見芳樹枝
春花落盡蜂不窺
君不見梁上泥
秋風始高燕不栖
蕩子從君事征戰
蛾眉嬋娟守空閨
獨宿自然堪下淚
況復時聞烏夜啼

其四

君不見門前柳
榮耀幾時蕭索久
君不見陌上花
狂風吹去落誰家
鄰家思婦見之歎
蓬首不梳心歷亂
盛年夫婿長別離
歲暮相逢色凋換

其五

君不見巖下井百尺不及泉君不見山上苗數寸凌
雲煙人生相命亦如此何苦太息自憂煎但願親友
長含笑相逢不乏杖頭錢寒夜邀歡須秉燭豈得常
思花柳年

崔國輔

對酒吟

行行日將夕荒村古塚無人跡蒙籠荆棘一鳥吟屢
唱提壺沾酒喫古人河岳英靈集作前身不達酒不足遺恨精
靈傳此曲寄言世上諸少年平生且盡杯中醪

賈至

巴陵寄李二戶部張四禮部

江南芳草初纂纂愁殺江南獨愁客秦中楊柳也應
春轉憶秦中相憶人內里鶯花不相見登高一望淚
沾巾

孟雲卿

行路難

君不見高山萬仞連蒼旻天長地久成埃塵君不見
長松百尺多勁節狂風暴雨終摧折古今何世無聖
賢吾愛伯陽真乃天金堂玉闕朝羣仙拍手東海成
桑田海中之水慎勿枯烏鳶啄蚌傷明珠行路難艱

險莫踟躕

王季友

觀于舍人壁畫山水

野人宿在山家少朝見此山謂山曉半壁仍栖嶺上
雲開簾欲放湖中鳥獨坐長松是阿誰再三招手起
來遲于公大咲向余說小第丹青能爾為殷璠云甚
有清趣

宿東谿李十五山亭

上山下山入山谷谿中落日留我宿松石依依當主
人主人不在意亦足名花出地兩重階絕頂平天一
小齋本意由來是山水何用相逢語舊懷

代賀若令譽贈沈千運

相逢問姓名亦存別時無子今有孫山上雙松長不
改百家唯有二家村南村西車馬道一宿通舟水
浩浩澗中磊磊十里石河上淤泥種桑麥平坡塚墓
皆我親滿田主人是舊客舉聲酸鼻問同年十人七
人歸下泉分手如何更此地口頭不去淚潸然

酬李十六岐

鍊丹文武火未成賣藥販屨俱逃名出谷迷行洛陽
道乘流醉臥滑臺城城下故人久離怨一歡適我兩
家願朝飲杖懸沽酒錢暮餐囊有松花飯于何車馬

日憧憧李膺門館爭登龍千賓揖對若流水五經發
難如扣鐘下筆新詩行滿壁立談古人坐在席問我
草堂有臥雲知我山儲無儋石自耕自刈食爲天如
鹿如麋飲野泉亦知世上公卿貴且養丘中草木年

常建

張公子行

日出乘釣舟嫋嫋垂釣竿涉淇傍荷花驄馬閑金鞍
使君白雲中腰間垂轆轤出門事嫖姚爲君西擊胡
胡兵漢騎相馳逐轉戰孤軍海西北百尺旌竿沈黑
雲邊笳落日不堪聞

劉云從閑人幽事忽
寫至敗軍人將險絕

古意

井底玉冰洞地明琥珀轆轤青絲索僊人騎鳳披綵
霞挽上銀瓶照天閣黃金作身雙飛龍口銜明月吐
芙蓉一時度海望不見曉上青樓十二重

古興

轆轤井上雙梧桐飛鳥銜花日將夕深閨女兒莫愁
年玉指冷冷怨金碧石榴裙裾蛺蝶飛見人不語顰
蛾眉青絲素絲紅綠絲織成錦衾當爲誰

元結

歸來子云結性耿介有憂道閔俗之意天
寶之亂或仕或隱自謂與世聳牙故其見

卷之三十一
於文字者亦冲澹而隱約譬古鐘磬不諧於里耳而詞義微妙翫之翛然若有塵外之趣云

引極

天曠漭兮杳泱茫氣浩浩兮色蒼蒼上何有兮人不測積清寥兮成元極成元極兮靈且異思一見兮貌難致思不從兮空自傷心慙勞兮意惶懷思假翼兮鸞鳳乘長風兮上翔揖元極兮本深實餐至和兮永終日

招太靈 并序

商餘山有太靈古祠傳云豢龍氏祠大帝所

立祠在少餘西乳之下邑人脩之以祈田余

因爲招詞閔之文以演興辭曰

招太靈兮山之巔山屹屺兮水淪漣祠之禩洛代切兮

盼何年木脩脩兮草鮮鮮嗟魑魅兮淫厲自古昔兮

崇祭禧太靈兮端清余願致兮精誠久憊憊改歷切兮

恍恍處龍切招捨擻郎丁切兮呼風風之聲兮起颺颺吹

玄雲兮散而浮望太靈兮懺而安澹油容兮都清閑

宿洄溪翁宅

長松萬株繞茆舍怪石寒泉近簷下老翁八十猶能行將領兒孫行時稼吾羨老翁居處幽吾愛老翁無

所求時俗是非何足道得似老翁吾即休
宿無爲觀

九疑山深幾千里峰谷崎嶇人不到山中舊有僊姥
家十里飛泉繞丹竈如今道士三四人茹芝鍊玉學
輕身霓裳羽蓋傍林壑飄飄似欲來雲鶴

薛業

洪州客舍寄柳博士芳

去年燕巢主人屋今年花發路傍枝年年爲客不到
舍舊國存亾那得知胡塵一起亂天下何處春風無
別離

張志和

漁父歌

西塞山前白鷺飛桃花流水鱖魚肥青莢笠綠蓑衣
斜風細雨不須歸

獨孤及

和贈遠

憶得去年春風至中庭桃李映瓊牕美人挾瑟對芳
對玉顏亭亭與花雙今年新花如舊時去年美人不
在茲借問離居恨深淺祗應獨有庭花知

同岑郎中韋屯田員外花樹歌

東風動地吹花發渭城桃李千樹雪芳菲可愛不可
留武陵歸去心欲絕金華省郎惜佳辰祇將花萼照
青春君家自是成蹊處況有庭花作主人

張潮

襄陽行

玉盤轉明珠君心無定準昨見襄陽客刺說襄陽好
無盡襄漢水峴山垂漢水東流風北吹只言一世長
嬌寵那悟今朝見別離君渡清羌渚知人獨不語妾
見木柶林憶君相思深莫作雲間鴻離聲顧儔侶尚
如匣中劍分形會同處是君婦識君情怨君恨君爲

此行下牀一宿不可保況乃萬里襄陽城襄陽傳近
大堤北君到襄陽莫回惑大堤諸女兒憐錢不憐德

鮑防

雜感

漢家海內承平久萬國戎王皆稽首天馬嘗銜首宿
花胡人歲獻蒲萄酒五月荔枝初破顏朝辭象郡夕
函關鴈飛不度桂陽嶺馬走先過林邑山甘泉御果
垂僊閣日暮無風香自落遠物皆重近皆輕雞雖有
德不如鶴

七言古詩卷之七

唐詩品彙三十一

七言古詩卷之八

唐詩品彙三十二

新寧高 棟編輯

關中張 恂重訂

接武^上

劉長卿

王昭君歌

自矜嬌艷色不顧丹青人誰知粉繪能相負却使容
華翻悞身上馬辭君嫁驕虜玉顏對人愁不語北風
鴈急浮雲秋萬里獨見黃河流纖腰不復漢宮寵雙
蛾長向胡天愁琵琶絃中苦調多蕭蕭羌笛聲相和

唐詩品彙

卷之三十一

誰憐一曲傳樂府能使千秋傷綺羅

銅雀臺

嬌愛更何日高臺空數層含啼映雙袖不忍看西陵
漳水東流無復來百花輦路爲蒼苔青樓月夜長寂
寞碧雲日暮空裴徊君不見鄴中萬事非昔時古人
不在今人悲春風不逐君王去草色年年舊宮路宮
中歌舞已浮雲空指行人往來處

新安送陸豐歸江陰

新安路人來去早潮復晚潮明日知何處潮水無情
亦解歸自憐長在新安住

長沙贈衡嶽祝融峯般若禪師

般若公般若公負鉢何時下祝融歸路却看飛鳥外
禪房空掩白雲中桂花寥寥閑自落流水無心西復
東

明月灣尋賀九不遇

楚水日夜綠傷江春草滋青青遙滿目萬里傷心歸
故人川上復何之明月灣南空所思故人不在明月
在誰見孤舟來去時

送友人東歸

對酒灞亭暮相看愁自深河邊草已綠此別難爲心

關路迢迢足馬歸垂楊寂寂數鶯飛憐君獻策十餘
載今去猶爲一布衣

入桂渚次砂牛石穴

扁舟傍歸路日暮瀟湘深湘水清見底楚雲淡無心
片帆落桂渚獨夜依楓林楓林月出猿聲苦桂渚天
寒桂花吐此中無處不堪愁江客相看淚如雨

贈湘南漁父

聞君何所適漠漠逢煙水獨與不繫舟往來楚雲裏
釣魚非一歲終日只如此日落江清桂檝遲織鱗百
尺深可窺沈鈎垂餌不在得白首滄浪空自知

送姨子弟往南郊

一展慰久濶寸心仍未伸別時兩童稚及此俱成人
那堪適會面遽已悲分手客路向楚雲河橋對衰柳
送君足馬別河橋汝南山郭寒蕭條今我單車復西
上郎去灞陵轉惆悵何處共傷離別八月亭亭兩
相望

客舍喜鄭三見寄

客舍逢君未授衣閉門愁見桃花飛遙想故園今已
爾家人應念行人歸寂寞垂楊映深曲長安日暮靈
臺宿窮巷無人鳥雀閑空庭新雨莓苔綠此中分與

故友踈何年仍回長者車十年未稱平生意好得辛
勤謾讀書

嚴陵釣臺送李康成赴江東使

潺湲子陵瀨髣髴如在目七里人已非千年水空綠
新安江上孤帆遠應逐楓林千萬轉古臺落日共蕭
條寒水無波更清淺臺上漁竿不復持却令猿鳥向
人悲灘聲山翠至今在遲爾行舟晚泊時

觀李湊所畫美人障子

愛爾含天姿丹青有殊智無間已得象象外更生意
西子不可見千載無重還空令浣紗態猶在含羞
一咲豈易得雙蛾如有情牕風不舉袖但覺羅衣輕
華堂翠幕春風來內閣金屏曙色開此中一見亂人
目只疑行到雲陽臺

送賈三北遊

賈生未達猶窘迫身馳疋馬邯鄲陌片雲郊外遙送
人斗酒城邊莫畱客顧予他日仰時髦不堪此別相
思勞雨色新添漳水綠夕陽遠照薊門高把袂相看
衣共緇窮愁只是惜良時亦知到處逢下榻莫滯秋
風西上期

送郭六侍御之武陵郡

常愛武陵郡美君將遠尋空憐世界迫孤負桃源心
洛陽遙想桃源隔野水閑流春自碧花下常迷楚客
船洞中時見秦人宅落日相看斗酒前送君南望但
依然河梁馬首隨春草江路猿聲愁暮天丈人別乘
佐分憂才子趨庭兼勝遊豐浦荊州行可見知君清
興滿滄洲

齊一和尚影堂

一公住世忘世紛暫來復去誰能分身寄虛空如過
客心將生滅似浮雲蕭散浮雲往不還淒涼遺教沒
仍傳舊地愁看雙樹在空堂只是一燈懸一燈長照
恒河沙雙樹猶落諸天花天花寂寂香深殿苔蘚蒼
蒼閉虛院昔余精念訪禪扉常接微言清道機今成
寂寞無所得惟共門人淚滿衣

聽笛歌留別鄭協律

舊遊憐我長沙謫載酒沙頭送遷客天涯望月自沾
衣江上何人復吹笛橫笛能令孤客愁綠波淡淡如
不流笛聲寥亮羽聲苦江天寂歷江楓秋靜聽關山
聞一叫三湘月色悲猿嘯又吹楊柳激繁音千里春
色傷人心隨風飄向何處落唯見曲盡平湖深發
與君離別後馬上一聲堪白首

望龍山懷道士許法稜

心惆悵望龍山雲之際鳥獨還懸嵯絕壁幾千丈綠
蘿嫋嫋不可攀龍山高誰能踐靈原中蒼翠晚嵐煙
瀑水如向人終日迢迢空在眼中有一人披霓裳誦
經山頂餐瓊漿空林閑坐獨焚香真官列侍儼成行
朝入青霄禮玉堂夜掃白雲眠石牀桃源洞裏居人
滿桂樹山中住日長龍山高高遙相望

戲贈干越尼子歌

鄱陽女子年十五家本秦人今在楚厭向春江空浣
紗龍宮落髮披袈裟五年持戒長一食至今猶自顏

如花亭亭獨立青蓮下忍草禪枝繞精舍自用黃金
買地居能嫌碧玉隨人嫁北客相逢疑姓秦鈿華拋
却仍青春一花一竹如有意不語不咲能畱人黃鸝
欲栖白日暮天香未盡經行處却對香爐閑誦經春
泉漱玉寒冷冷雲房寂寂夜鐘發吳音清切令人聽
人聽吳音歌一曲杳然如在諸天宿誰堪世事又相
牽惆悵回船江水綠

時平後送范倫歸安州

昨聞戰罷圖麟閣破虜收兵卷戎幙滄海初看漢月
明紫微已見胡星落憶昨扁舟此南渡荆棘煙塵滿

歸路與君攜手姑蘇臺望鄉一日登幾回白雲飛鳥
去寂寞吳山楚岫空崔嵬事往時平還舊丘青春
草近家愁洛陽舉目今誰在潁水無情應自流吳苑
西人去欲稀畝連一日空知非江潭歲盡愁不盡鴻
鴈春歸身未歸萬里遙縣帝鄉憶五年空帶風塵色
却到長安逢故人不道姓名應不識

疲兵篇

驕虜乘秋下薊門陰山日夕煙塵昏三軍疲馬力已
盡百戰殘兵功未論陣雲決濟屯塞北羽書紛紛來
不息孤城望處增斷腸折劍看時可沾臆元戎日夕
但歌舞不念關山久辛苦自矜倚劍氣凌雲却笑聞
笳淚如雨萬里飄颻空此身十年征戰老胡塵赤心
報國無片賞白首還家有幾人朔風蕭蕭動秋草旗
旌獵獵榆關道漢月何曾照客心胡笳只解催人老
軍前仍欲破重圍閨裏猶應愁未歸小婦十年啼夜
織行人九日憶寒衣飲馬滹河晚更清行吹羌笛遠
歸營只恨漢家多苦戰徒令遺鏃滿長城

錢起

行路難

君不見明星映空月太陽朝昇光盡歇君不見凋零

委路蓬長風飄舉入雲中由來人事何常定且莫驕
奢咲賤窮

效古秋夜長

秋漢飛玉霜北風掃荷香含情紡織孤燈盡拭淚相
思寒漏長簷前碧雲淨如水月弔栖鳥啼鴈起誰家
少婦事鴛機錦幙雲屏深掩扉白玉牕中聞落葉應
憐寒女獨無依

盧龍塞行送韋掌記

雨雪紛紛黑山外行人共指盧龍塞萬里飛沙咽鼓
鼙三軍殺氣凝旌旆陳琳書記本翩翩料敵張兵奪
酒泉聖主好文兼好武封侯莫比漢皇年

送馬明府赴江陵

陶令南行心自永江天極目澄秋景萬室遙知犬不
鳴雙鳧下處人皆靜清風高興得湖山門柳蕭條雙
翟閑黃花滿把應相憶落日登樓北望還

送崔十三東遊

千里有同心十年一會向當杯緩箏柱倏忽催離燕
丹鳳城頭噪晚鴉行人馬首夕陽斜灞上春風留別
袂關東新月宿誰家宮柳依依兩鄉色誰能此別不
相憶

送崔校書從軍

鴈門太守能愛賢
麟閣書生亦投筆
寧惟玉劍報知已
更有龍韜佐師律
別馬連嘶出御溝
家人幾夜望刀頭
燕南春草傷心色
薊北黃雲滿眼愁
聞道輕生能擊虜
何嗟少壯不封侯

賦得青城山歌送楊杜二郎中赴蜀軍

蜀山西南千萬重
仙經最說青城峰
青城嶽岑倚空碧
遠壓峨眉吞劍壁
錦屏雲起易成霞
玉洞花明不知夕
星臺二妙逐王師
阮瑀軍書王粲詩
日落猿聲連玉笛
晴來山翠傍旌旗
綠蘿春月營門近
知君對酒遙相思

送張將軍西征

長安少年唯好武
金殿承恩爭破虜
沙場烽火隔天山
鏃騎西征幾歲還
戰處黑雲霾瀚海
愁中明月度陽關
玉笛聲悲離酌晚
金方路極行人遠
計日霜戈盡敵歸
回首戎城空落暉
始咲子卿心計失
徒看海上節旄稀

送鄔三落第還鄉

郢客文章絕世稀
常嗟時命與心違
十年失路誰知已
千里思親獨遠歸
雲帆春水將何適
日愛東南暮

山碧關中新月對離樽江上殘花待歸客名宦無媒
自古遲窮途此別不堪悲荷衣垂釣且安命金馬招
賢會有時

畫鶴篇

省中作

點素凝姿任畫工霜毛玉羽照簾櫳借問飛鳴華表
上何如粉績綵屏中文昌宮近芙蓉闕蘭室氤氳香
煙結鑪氣朝成綏嶺雲銀燈夜作華亭月日暖花明
梁燕歸應驚片雪在且闡主人顧盼千金重誰肯徘
徊五里飛

送畢侍御謫居

崇蘭香歿玉貞折志士吞聲甘狗節忠蓋不爲明主
知悲來莫向時人說滄浪之水見心清楚客辭天淚
滿纓百鳥喧喧噪一鷄上林高枝亦難托寧嗟人世
棄虞翻且喜江山得康樂自憐黃綬老嬰身妻子朝
來勸隱淪桃花洞裏舉家去此別相思復幾春

送傅管記赴蜀軍

終童之死誰繼出燕領儒生今俊逸主將早知鸚鵡
賦飛書許載蛟龍筆峨眉玉壘指霞標鳥沒天低幕
府遙巴山雨色藏征旆漢水猿聲咽短簫賜璧腰金
應可料才畧縱橫年且妙無人不重樂毅賢何敵能

當魯連嘯日暮黃雲千里昏壯心輕別不銷魂勸君
用却龍泉劍莫負平生國士恩

送褚大落第東歸

離琴彈苦調美人慘向隅頃來荷策干明主還復扁
舟歸五湖漢家側席明啟久豈意遺賢在林藪玉堂
金馬隔青雲墨客儒生皆白首昨夢芳洲採白蘋歸
期且喜故園春稚子只思陶令至立君不厭馬卿貧
剡中風月久相憶池上舊遊應再得酒熟寧孤芳杜
春詩成不枉晴山色念此那能不美歸長楊諫獵事
皆違他日東流一乘興知君爲我掃荆扉

韓翃

送客還江東

還家不落春風後數日應沽越人酒池畔花深鬪鳴
闌橋邊雨洗藏鴉柳遙憐內舍着新衣復向鄰家醉
落暉把手閑歌香橘下空山一望鷓鴣飛

送客之江寧

春流送客不應賒南入徐州見柳花朱雀橋邊看淮
水烏衣巷裏問王家千閭萬井無多事關戶開門向
山翠楚雲朝下石頭城江燕雙飛瓦棺寺吳士風流
甚可親相逢嘉賞日應新從來此地夸羊酪自有尊

羹味可人

和高平朱參軍思歸作

髯參軍髯參軍身爲北州吏心寄東山雲坐見萋萋
芳草綠遙思往日晴江曲刺船頻向剡中回捧被曾
過越人宿花裏鶯啼白日高春樓把酒送車螯狂歌
好愛陶彭澤佳句唯稱謝法曹平生樂事多如此忍
爲浮名隔千里一鴈南飛斷客心思歸可待秋風起

贈別王侍御赴上都

翩翩馬上郎執簡佩銀章西向洛陽歸郵杜迴頭結
念蓮花府朝辭芳草萬歲街暮宿春山一泉塢青青
樹色傍行衣乳燕流鶯相間飛遠過三峰臨入水幽
尋佳賞偏如此殘花片片細柳風落日疎鐘小槐雨
相思掩泣復何如公子門前人漸疎幸有心期當小
暑葛衣紗帽望迴車

題玉山觀禪師蘭若歌

玉山宴坐移年月錫杖承恩詣丹闕先朝親與會龍
華紫禁鳴鐘白日斜宮女焚香把經卷天人就席禮
袈裟禪林久臥虎谿水蘭若初開鳳城裏不出囂塵
見遠公道成何必青蓮宮朝持藥鉢千家近暮倚繩
牀一室空掖垣揮翰君稱美遠客陪遊問真理薄宦

深知誤此心迴心願學雷居士

寄哥舒僕射

萬里長城家一生唯報國腰垂紫文綬手控黃金勒
高視黑稍翁遙吞白騎賊先麾牙門將轉鬪黃河北
帳下親兵皆少年錦衣承日繡行纏轆轤寶劍初出
鞘宛轉角弓新上弦步人抽箭大如笛前把兩矛後
雙戟左盤右射紅塵中鶻入鴉羣有誰敵殺將破軍
白日餘迴旃舞旆北風初羣公楯鼻好磨墨走馬爲
君飛羽書

送中兄典邵州

官騎連西向楚雲朱軒出餞晝紛紛百城兼領安南
國雙筆遙揮左君一路諸侯爭館穀洪池高會荆
臺曲玉顏送酒銅鞮歌金管留人石頭宿北鴈初回
江燕飛南湖春煖着春衣湘君祠對空山掩漁父焚
香日暮歸百事無留到官後重門寂寂垂高柳零陵
石缺過香溪洞口人來飲醇酒登樓暮結邵易情萬
里蒼波烟靄生他日新詩應見報還如宣遠在安城


送萬臣

漢相見王陵楊州事張禹雲帆木蘭曳水國蓮花府
百丈清江十月天寒城鼓角曉鐘前金爐促膝諸曹

吏玉管繁聲美少年有時過向長干地遠對湖光近
山翠好逢南苑看人歸也向西池留客醉疎柳垂烟
橘帶霜朝游石渚莫橫塘紅箋色奪風流座白紵詞
傾翰墨場夫子前年入朝後高名籍籍時賢口共憐
詩興轉清新遠繼家聲在此身屈指待爲青鑲客回
頭莫羨白亭人

別汜水陳縣尉

未央宮殿金開鑰詔引賢良卷珠箔花間賜食近丹
墀烟裡揮毫對青閣萬年枝影轉斜光三道先成君
激鼻谷永直言身不顧郊銑高地轉名香綠槐陰陰
出關道上有蟬聲下秋草奴子平頭駿馬肥少年白
皙登王畿五侯客舍偏宿留一縣人家爭看歸南向
千峰北臨水佳期賞地應窮此賦詩或送鄭行人舉
酒常陪魏公子自憐寂寞會君稀猶着前時博士衣
我欲低眉問知己若將無用廢東歸



七言古詩卷之八

唐詩品彙三十二



